

萬曆武功錄

萬曆武功錄卷之二

翰林院添註待詔瞿九思著

兩京

南直隸

江賊何旺李七列傳

何旺。蕪湖盜也。甲戌夏。縣令倪湯。以民事適旁近郡。先是旺與沙環等。公行江上。桴鼓晝鳴。一日道蕪湖。見縣無城郭。心竊數數然動。廼相與謀曰。盍不入其庫而奪之金乎。環曰。毋妄言。妄言。覺矣。是日微使人走縣庭。會縣令出。庭中空無人。於是乘夜半。鐘鳴漏

盡巡徼吏及司庫奚仁能皆睥睨。旺乃以二百餘人循牆而進。執司庫奪庫金凡伍千八百七十八兩伍錢。視縣事者丞李亞春。見賊勢盛弗出。望等得揚揚盈囊而入於江也。且日出。亞春卽請於備兵使丁應壁及太平守錢立貴。江防使陳所敏。廼簿責把總承應奎。指揮戴冕。百戶徐鑒。巡徼之謂何。於是罰治司庫。賣子鬻產。猶不能償其什一二。而廼使使者疏捕江干。旣四面而出。是時諸倫固知我邏卒追逐急也。乃相與議。議分金別去。而旺等僅遺六人。偕携一千一百七十餘金。直走太興馬橋鎮。詳爲賈人收買。未

忝以示毋疑。所在見旺銀皆有鑿字。疑此必庫金。因使邏卒執之。鄒鑑縣庭中。鞠問。果蕪湖曩所爲略庫盜也。居頃之。操江使輩堯封及臺御史宋儀望。御史鮑希顏。蔣科皆輕重當備兵使以下罪以請。而尚書傅頤給諫蔡汝賢。王頤亦劾。奏其事。先是春二月。

儀真卿大夫曾三省被盜焚燒男女十四人。以故廷議爲江防計至悉。而上亦幸念南畿重地。武備不修。江洋盜賊公行。乃問諸兩臺。且詔謂科道公論所出。如今人臣爲國家任事。有功者便苛責。搜求無已。因循疎怠。玩時失事。却一言不及。公論何在。事下。

吏兵二部問狀。於是大家宰張瀚大司馬譚綸覆

奏與臺諫所請同。詔廼寬假宋儀望以望視事日

淺也而獨董堯封調外任貶秩一等巡江諸御史侯

滿歲考察承應奎等閑住李亞春免官皆付罪行間

提邏卒大索諸偷於江上也居二月儻兵使王叔果

捕獲偷長陳子胡並其等。詔梟斬以徇江上。

李七江都盜也專與小巷胡雲霞行江干丁丑冬七

等道江都而會鹽商宋國徽居鈔關頗以財賄七廼

與其黨呂守城謀曰吾等得執此人足吾事矣宋堅

城何而比丘日池樂玄前日阿僧自有笑亡之也。是

夜夜漏十三刻。皆後先乘隙而入。直馳國徽室。奪其金千餘兩。及鹽引首飾。諸什物亡筭。是時鍾鳴漏盡矣。而縣道倉卒不及聞。以故諸偷得亡恙。七等既得金。欲出城急。卽詳爲巡徼兵。數數然走北關。索魚鑰。而監門石恒等。固疑此必非巡徼兵也。堅弗與。七等竟斬關而去。旦日江都令秦應驄。及巡徼指揮王表。同知張民範。請於太守虞德燁。因移備兵使陳文煥。檄所在大索江干。不可得。而是時李七李憲等三十人。已揚揚鼓行而至秣陵。廼且莫遊於酒人乎。從歌兒舞女。飲醇酒。大自踰快也。而東城兵馬使劉榮。

使番兵呂甫等偵之。且得其狀。卽逮捕。以檻車膠致臺。御史張岳所。於是請於上。先是。檠收捕呂得茂。而南司馬翁大立至。是請以檠遷應天。俸行兵馬事。或先加五品服俸。以旌其功。是時。上怒諸臣隱匿不報。皆下大司馬方逢時問狀。頃給諫裴應章劾奏其事。而會大裕。上復謂急忙論。奏塞責且不究。於是大司馬覆請。上幸賜文煥告。罰虞德燁。秦應驄。董光裕。俸凡三月。張民範等下御史逮問。賜劉檠服俸視五品。而復申之曰。近來地方官以捕法嚴。往往隱匿避罪。或諱言賊情。務爲無事。反責失主。

妄報以致盜賊滋多。將來必成此患。欽哉。王言其誰不凜凜於明威乎。上寧寬假其期。務在收捕而已。先是李憲等繫獄。而會蔡飲中貴人高順所。憲見獄外。獨陶葵守之。廼越獄。歐傷蔡什地。卽走。奔屠者馮五乃。殺市民秦果。李鳳。以畏阻追亡者。旣行。至正陽門。監門中貴人劉忠。使使者馮欽。馮玉執之。就吏於是給諫王良心劾。奏蔡至備也。

讚曰

善哉乎。宋公鮑公。所條對諸計畫也。余嘗南到新安。西過江淮矣。而江盜礦盜。最號爲強盛。廼欲盡緣江

居民編爲保甲。而以洲長隊長統之。假令蚤行其策。則豈復有何旺。李七哉。至若黃山。良禾嶺。及大鱗嶺。皆滿增邏司。此尤所以深爲礦計。余每覽是疏。則未嘗不爽然自失也。

海賊嚴大邦列傳

嚴大邦海上巨盜也。與王安宗楊善先是沈壁以保姦伏漢法適邊久之還逃而歸。乃嘆曰。人言不能流芳百世。亦當移臭萬年。吾豈能長嬰大罪。而以一戍卒老死塞上乎。卽買舟走海上。與嚴大邦嚴中行約。與其居海島間。鼠竊狗偷。孰與拏舟。命榜人揚帆而走。三吳可乎。於是聚黨數百人。直走牛角尖。牛角尖故嘉定界也。大邦等殊不畏疆吏法。至威重。廼執戎兵。公行村落中。略朱四。王榜。羅應鎮。唐歪頭。燒沈教。徐良。朱阿二。桴鼓晝鳴。是時備兵使王叔杲檄遊擊

童養浩千戶周崇仁日夜巡徼江上唯恐安等不東走越則北入海也頃邏卒收捕大邦中行詣太守吳善言對簿皆辭染有仇者以飾已非太守故知此曹皆世居海上盤牙連歲出沒海洋江浦之間而故託名在官聾瞽所在由此縣庭左右皆一切願爲耳目縣道莫能禽今賴陛下威武執大邦廼以其家貲沒入縣官修起城垣令官兵犁其庭掃其廬而營堡之因行保甲法則廟堂聞而後喜可知矣而臺御史宋儀望上書以請事下大司馬譚綸覆奏乃梟斬嚴大邦等於海島間諸偷於是乎解散不敢復

入太倉界。

讚曰

崇明去海島甚近乎。而患在保姦。不畏沈命法。諸偷盜竝亡。抵於其所。異哉。今動一嚴大邦。海濱皆圍視。而懼無復欲干我橫海將軍者矣。以余所聞。成周時海不揚波。庶幾近是與。不然。何海邦諸逋寇滅之不遺餘力也。

湖盜殷應采列傳

殷應采太湖盜也。太湖故震澤之水，跨蘇常湖三大郡，寥邈八百里而遠，港瀆縱橫，蘆葦翳翳，湖盜往往窺秋冬之隙，相扇而起。戊子歲，饑民流盜賊公負而殷應采等遂以五月乘夏水，操輕舟十餘艘往來茭瀆沙塘港之間，略瞿守愚、戴良、龍裴、炯、橐中裝而去。自是之後，應采益慄悍，亡所顧忌，身常服鮮紅袍，推擇鎮江比丘一人爲長，諸酋皆稱長官，其姓名唯恐人知。有如蘇常事覺，則闕匿於浙中。湖南索急，則鼠竄於湖北，自以爲漢法，烏柰我何也。乃至周鐵橋群

爲民買桑因略桃灣諸富室而會吳江人張春舟載
綿紬道逢應采采等竝略其舟是時海防使沈堯中
祝眉壽卽與常州守譚桂及宜興令陳璘瑋帥簿吳
坤邏使李清倫巡徼沙塘百瀆烏溪諸港港中盡以
校聯樹塞其中禁行舟過賓往來也應采等果不敢
入禁地乃分其三舟載油十簍又詐爲商直走長興
出賣謂近事而下邳諸邏卒鏖戰香山嘴殺六人生
得十六人諸偷悉遂逃走走黃瀆湖而大保崔忠等
追亡逐北奪獲賊舟一艘及衣服諸什物廼止壁馬
跡焦橫山然亦乍往乍來亡常所也於是臺御史余

立廼咨浙臺御史滕伯翰卽檄備兵使李涑提劉河
兵出宜興躡其後副總戎馬繼武提吳淞兵出胥口
邀其前是日兩營沙唬船旣四面而至而我伏波將
軍先以四小艇詳爲賈人偵諸偷諸偷則悉已入馳
馬山矣廼下令把總韓良貴等偃旗鼓分道而進旣
進至馬山山下空無人卽趨召土人胡應陽等問狀
應陽具言諸偷多湖州長興人專乘大風能破浪而
行行不得風輒潛荏葦中風來又復挈舟去去殆如
鳥徙將軍向來吾等猶及望見群數十艇殷殷在西
山灣也於是將軍躬提樓船十餘艘追逐至長興夾

蒲港。果若山人言。猶在萑葦中。有狀於是。祝海防兵。生獲高酒。談虎高志。顧康殷周。顧良士。殷玘。盧梓。蔡五。吳把總兵。生獲渠魁。殷應采。沈海防兵。生獲高泮。殷模。殷植。馬總戎兵。生獲和尚如成。及吳勘。蔣秀。周科。徐侃。沈秀。丁洪等。餘黨復逐逃。先是。上有詔。詔所在協力禽捕。以靖地方。而湖州捕諸港亦急。乃生獲陸良策。王正。高良。臣潘阿毛等。以百數。是後臺御史余立。御史荆州士。及浙御史馬朝陽。皆後先使使者。奏事。乃請以廷臣條對。善後諸計策。於是給諫張希臯。御史彭而珩。方萬策。及三臺復以書奏對。

書多不載。大略掣吳淞遊兵五百人。或以叅將遊擊
統之。於吳縣則備胥口。石湖大關口。白洋灣。莫舍渡。
於吳江則備葉港。雪落港。簡村。鮎魚。韭溪。柵關口。於
宜興則備沙塘。烏溪。定灣。荆溪。寶東。蠡河。陽溪。寶下
埠口。馬跡山。於無錫則備獨山。浦嶺。吳塘。而它間道
於丹陽則備七里橋。於常州則備普濟橋。於武進則
備戚墅堰。於無錫則備花渡橋。此又其計之得者也。

讚曰

善哉乎方直指。防內應諸策也。嘉靖中倭入浙。獨台
州被倭尤甚。厥後乃知其爲台人實導之也。今所收

捕殷應采等大半多湖州長興人然則旁近諸郡豈
不岌岌乎有戒心哉信矣馬直指巡倣及連坐諸條
對當亟講也語不云乎前事之不忘後事之師余每
一語及震澤事則未嘗不爲三吳爲杞人也

運河賊劉朝列傳

劉朝徐州盜也。以鼠竊狗偷爲務。國家漕輓四百萬。皆道徐州。歲時冠蓋相望。殷殷不絕也。以故運河諸偷常夜半窺過。賓之隙潛失。舟後乘幫而上。俗號爲抽幫。辛巳秋。大官丞張公行走長安。而賈人朱思綬橐中金銀服飾甚備。廼附梗以行。既行至戚家港。會莫諸舳艫皆止舍。朝與李艾等固偵官舟至。悉夜半果乘舟中。人瞋睡。帥衆緣幫走走舟中。執梗與綬略其橐中裝而去。是時州太守缺。會運同孫養魁視事。而州同魏守道及指揮金承宗千戶楊桂又

日夜提邏。率巡徼河上。倉卒聞斯事。則皆攘臂而起。以爲此屬何足勞苦我河上過賓。至囊不遺一錢。縱彼不言。余獨不媿於心乎。必執朝等。請湯鑊之誅。余然後有辭於主臣。廼疏捕河濱果執劉朝等九人。就吏卽以便輿膠致解。兵使張純所曰。是固盜竊我河上大官者。吾等問諸水濱十餘日而後得也。頃之倖兵使請於臺御史凌雲翼及御史陳用賓。於是乎論及徐州衛矣。指揮使蘇瑯。金漢及都護常國禎皆罪至不可赦。同臺所上書。唯冀天子寬假河上諸臣。臣等以重輕敢請論如法。上卽有詔。詔釋金承

宗。楊桂。俸。凡三月。蘇暉。金漢。凡一月。而獨魏守道。孫養魁。及張純。常國禎。皆不治。以諸偷所未捕者。僅遺九人而已。

讚曰

徐州故饒道。歲時舳舻相望。不乏矣。而劉朝。廼至巧爲計畫。執過賓而奪之金。然旋禽矣。烏足置齒牙間乎。余獨慮此邦。實國門戶也。詩曰。迨天之未陰雨。徹彼桑土。綢繆牖戶。如余深有味乎其言也。

合肥山陽諸強賊列傳

合肥諸賊亦不知其名姓也。乙亥春。大司馬傅頤使主事張弘毅指揮湯欽千戶陸宗蔭轉輸十萬金往東粵。旣乘傳至合肥。而會長吏皆以叅謁行。驛騎不辦。低徊者久之。群盜乘夜半走公館。劫輜。頤臺隸救。僅去其一號。先是捕盜令甲。禁縣道叅謁送迎。於是大司農上書劾。奏請咨河漕尚書張翀欲收捕諸偷。於是上有詔。詔御史逮問。衛府縣長吏南法司逮問張弘毅等。所以簿責所司叅謁。及上官聽其奔趨者。抑何嚴密也。

黃遷山陽大盜也。故事造舟皆從清江浦。於是同知徐州王汝弼以庫金凡一千五百居江浦。而黃遷等伺知橐中裝夜半直擣公館執汝弼問橐金。弼不與被毆者數矣。遷等先已知所在特詳問以戲。弼竟奪其七百五十金而去。時庚辰春也。而山陽令魯錦丞陳國光卽請於備兵使游季勲。迺檄淮安太守宋伯華俸。況于栢及指揮張壽松楊叢大張羅。旦莫趨邏。率巡徼河上。頃之遷率收捕黃遷等九人檻車膠致府庭中。詔獄尚存遺四百餘金封府庫。然後移河漕尚書江一麟御史李時成並請論解兵使以下如法。

以奏唯。陛下輕重布之事。下御史大夫陳炯。覆奏。於是。上有詔。詔罰游李勲俸。凡三月。況于梧。宋伯華等。皆住俸。待罪行間。以捕諸偷也。黃遷竟梟斬山陽市。

讚曰

以天子使奉府庫金而行。尚欲要而奪之。安問它乎。淮北故多盜。然至執。天子使其事不多。概見異哉。語曰。鄙人何知仁義鄉。其利者爲有德。黃遷輩母。亦利所昏與。肥水城中十萬戶。廼爲盜賊所勞苦也。悲夫。

蘇松諸強賊列傳

下砂塲。故上海所部也。孤懸海濱。無城池。而獨以一
鹽課司居其中。丁丑夏。大盜三十人。夜半入公署。執
大使羅萬方。索金不可得。欲兵之。賴義僕羅東跑救。
僅傷左股及頭顱。竟劒斬東跪。殺其婢張余二人。去。
索副大使王斐及其妻王無金。又殺之。已執其僕王
顯。始得服飾俸金所在。竟略之而去。然顯亦被毆者
危矣。而是時縣令敖選去司七十里而遠。不及聞。且
日松江守賈待問。獨薄責三林。邏使蔣檢急。以三林
於所司不甚遠。廼未聞。以一兵矢相救援。安在其爲

巡徼吏也。先是備兵使王叔杲嚴保甲法。令水陸迭
操。遠近互察。而臺御史胡執禮。御史王民順。林應訓。
及兩浙御史。旁如式以故。皆寬假其罪。以請弗深治。
事下大司馬。方逢時議以爲下沙塲故多富室。何至
甘心塲官。殺慘多命。聚散倏忽。此或鹽徒竈戶。報怨
所司。催徵皆不可知。宜詔兩臺廉訪之。是時縣道
捕賊多罪。被賊者以致隱忍不告。設告對簿公庭。亦
不以得財貨爲念。此盜賊所繇以肆志也。凡此皆著
爲令。毋蹈往轍。上皆可之。廼住王叔杲。敖選王邦
奇。俸罷魏忠還衛。而復中。曰。賊徒敢於市鎮殺官。

劫財。臨時竟無一人救護。事後又不能捕獲一賊。平日法令廢弛可知。則諸臣誠無辭於明詔可知也。楊棟。姑蘇賊也。丁丑春。鄭一麟新除爲吏主職方事。偕家室往秣陵。旣行至姑蘇。會莫升次南潼子門。棟等訶知爲官舟也。是夜夜半。帥其衆入舟中。執一麟以刀傷左足。盡奪橐中裝而去。旦日巡徼經歷鄧橋。請於備兵使王叔杲。及太守李克實。吳令郝國章。大索邑中。收捕棟等七人。所略金具在於是。移臺御史胡執禮。御史王民順。林應訓。旣得其姦。滅皆以書劾。奏指揮宋木。王洪。千戶陳冕。通判何操。而王叔杲則

兩臺皆請寬假其罪。而獨給諫裴應章以爲當免。杲官以爲武備不修者戒。事下大司馬方逢時。大略以爲吳會東連大海。北枕長江。環西南皆太湖。中錯吳淞黃浦。劉孟諸河。固盜賊之藪也。然未有如國門之外。至僂官略金如今日者。則官兵巡徼之謂何。誠如臺諫議。唯陛下輕重罰治之。上廼罰李克實。郝國章。俸凡三月。住王洪。何操。俸捕賊而宋木等下御史逮問。王叔杲竟以調簡僻去也。棟等皆梟斬吳門市。自是之後。復收捕王子雲。趙金。周成。行刑亦如之。

譜曰

是時瓜州丹陽皆盜入城劫當室而奪之金。余不論
論其獨大者。下沙之役。潼子之役。一歲並發。僇及所
司。豈不異哉。以余而觀職方。實掌兵戎。甚不宜有此
語。曰。虎入城。擇人而食。豈楊棟謂與。

流賊楊儒列傳

楊儒。宿州流賊也。宿亳故旁。近大梁諸縣道。民易爲姦。而會歲饑。大梁偷長張小村。及王玳。張四等。公行。楊儒。廼與栢世虎。竄入其中。是時兩郡之衆固已一百五十餘矣。儒。廼好謂小村曰。我壽。穎。宿。亳之間。頗足以辱公等。車轍。公等有如一日。相扇而起。儒請負弩矢爲先鋒。小村對曰。幸甚。吾意亦欲如是矣。於是治旗幟。鼓吹。走西鄉。油榨集。略人畜產以傳餐。賴巡徼吏目王公祚。提邏卒鳴鼓逐捕諸偷。諸偷還走大梁。已復走石弓山。白晝大道之中。殺侯世強。略商人

鹽。奪葛甫妻楊馬安妻姬陳祿妻張揚戈躍馬馳騁於潁上。旁若無疆吏者乎。而勇士張栢福任謙等。廼請命於疆吏。小人能爲百姓驅除此屬。必不使流亡。得踐蹂廼疆場也。於是持弓矢與邏卒劉周張欣等直擣賊營。挑戰頗疾。力卽生獲張佐等七人。賊中流矢死者亦七人。栢世虎見賊衆旣敗北。乃頓足嘆曰。嗟乎已矣。與其嘿嘿而死。孰與以死決雌雄。死死未晚也。廼與劉周轉戰。周不幸身被一創。周亦創率殺虎。虎復中張欣矢。幾死。任謙奮而前。竟劒斬虎首而去。而會莫天大風雨。飛砂石蔽人面。賊且戰且走。我

兵直追亡逐北至大梁馬村橋日出而諸偷銳氣皆挫落久無能爲矣我兵生得王玳管九思趙強王徐何朋等五人。是後保姦馬達孫整亦以諸偷所鹵略盜布鎗刀畜產諸什物獻見州太守曰吾等小人自知有死罪。昨太守哀憐我。我固不敢貪尺寸之利以奸旗鼓也。於是解兵使唐鍊請於河漕尚書爰雲翼御史陳用賓。卽盛百世虎首縣于國門外。使偷盜毋敢效世虎也。然後以其事奏。上則給諫史繼宸修守之策亦至矣。

讚曰

余嘗溯大江而上。過大梁。還走三晉。延袤千餘里。豈
不廣與。而其下。城廓鮮稀。卽有之。亦皆土具。財所爲
悍衛之策。淺也。異哉。善乎。治城練兵之說。史給諫可
謂能抱長慮者乎。楊儒。張小村。特聘小一草寇耳。頽
上及大梁。猶皆受其禍也。悲夫。謾藏誨盜。可不戒哉。

崇明江陰諸盜列傳

蔡廷。崇明盜也。先是金壇大盜陸守。最慆悍。阻海上。公行。有司莫能禽。廷及顧周郎。楊全。曾八。曾相等。一日起。姑蘇。孰視諸倫。今海上獨守有籌策。可問曰。吾得此人。橫行三吳中。足吾事矣。於是挈馬兔。與陸守約。既得陸守。卽以樓船十三艘。鼓行而至三沙。海洋。桴鼓晝鳴。而把總管懋光。請於叅政使王叔杲。帥耆民陸英。陳玳等。沙船十餘艘。逐捕。獲盜舟二艘。舟中所載。闔器甚備。而會大風。忽從西北起。白浪如山。諸舟皆星散。而獨英舟損桅。幾沉溺。是時。盜徒亂。

如蘇廼乘隙夾攻英舟先登殺我兵楊六吳漢倪升及弓手王蘭史惠鉞手陳寶等二十六人傷十餘人而英亦被一創赴水賴天幸附篙浮至三汊沙水淺得不死時丙子五月也於是臺御史宋儀望御史郭思極以爲三汊沙去崇明道不遠照百戶王廷巡徼之謂何廼輕重案黃應中管懋光王廷罪以下大司馬譚綸問狀頃大司馬覆奏上有詔詔御史逮問黃應中王廷朱承勛貶管懋光祖職一級獨詔王叔杲策勵供職諸臣聞而知懼可知矣先是邏卒收捕蔡廷季山單四楊全錢八已捕陸守趙湧王

子見。翟軫。潘仰學。陳昌。葛俸。趙能。已捕小槐。嚴泰。張小菴。陳岱。薛瞎子。陸吳。蔡文華。而是時。上僅聞捕

獲蔡廷等十人。令會審處決。於是御史王民順。詔獄。當陸守。趙湧。王子見。罪至斬。蔡廷。適邊。陳岱。薛瞎子。蔡文華。陸吳。華輪。蘇詔。薛良。錢珍。皆請比配贖的決。顧蔡廷等十人。業已有。詔論決者。以故部使者。

題請。而給諫周良寅亦。上書劾。奏其事。事皆下

御史大夫。案王叅政使獄辭。錢八。顧周郎。實仇家所染。而葛稍。張二。皆以無辜得釋。而季山。單四。潘仰學。亦瘦死獄中。獨陸守。趙湧。王子見。具在。然亦非先所

逮捕者。至後獲葛奉。而報稱先獲。未獲黃后溪。而報稱已獲。此皆管懋光有大罪。罪當誅。果若科臣言。前後矛盾。法體乖謬。於是御史大夫追論前臺御史宋儀望及御史王民順以下罪。上謂前後招詞。混雜無紀。議擬舛謬。顯是初因失事重大。捏報要功。意圖掩飾。後乃朦朧遷就。致有抵誤。廼罰儀望俸。凡三月。叔杲凡半年。令民順還道考察。逮問管懋光。而陸守等有詔。卽復訊。是時宋儀望已轉遷大理卿矣。

上書願 賜骸骨。以白實無扶同者。

江陰諸盜盜其名姓。亦不可考矣。癸未冬。常操三艇。

乘風西北走。而是時指揮使孫光祐備千戶劉餘慶備黃田港。林承宗備唐沙港。承宗既出大洋。望見賊舟盡皆鹽徒。則大怒。髮上指冠。遂捕至段山港。轉鬪我兵敗北。殺張茂等七人。傷陳亞四等十餘人。鹽盜乘勝走大洋。環江以南數千里。鹽徒下江如蜚。傍若江土無人乎。而是時常州同知邊有猷下行江陰事。乃請於備兵使李頤及常州守王三錫。日夜提邏。率疏捕諸偷。不可得。卽咨江北旁縣道。協捕於是。臺御史郭思極。御史邢侗。孫維誠。孫旬皆後先上書請逮。問孫光祐。劉餘慶。量治邊有猷。以

倣巡徼吏。而李頤及王三錫實禍起倉卒。幸冀寬假其罪。是因欲著爲令。令江上嚴盤詰之法。凡船艘來往。毋陰蓄兵器。毋潛藏私鹽。有則亟以告。聽所在得請論如法。上幸可之。罰邊有猷倖。凡三月。孫光祜劉餘慶下御史逮問。自是之後。鹽徒亦畏三尺法。凜凜不敢奸。疆吏旗鼓也。

讚曰

以余所聞。吳王煮海爲鹽。法至善。今國家廼資以佐邊計。然哉。環大江以南北。皆鹽場。非竈丁則鹽徒比比而是。假令有如崇明江陰諸盜。相因而起。則司

寇之刀鋸。豈不日敝乎。語曰。刺繡文。不如倚市門。蔡
廷等豈志不在斯與。不然。何其亂之日暴也。

楊州通州饑竈列傳

楊州饑竈其姓名不可聞已庚辰春雨雪連旬禾黍不入百姓至取草根樹皮以爲食食不足輒饑餓死道上樵車相望而是時錢法亦壅滯商賈不通竈丁皆束手不得煮海以爲塩於是聚黨數百人白晝大都之中劫僧人而奪之米頃之疆欲赴請營田銀二萬兩而會御史姜堃巡視淮塩卽上書請縣官買米倣平糴法於民便而給諫郝維喬亦以爲淮揚徐沛之間乃宗廟陵寢所在而又東南餉道也大略以爲上幸予帑金以賑民當必推擇賢守令往

不則以郡察案行村落。察村落其貧貧最甚。然後官自予賑金。吏胥及伍長皆無所容銖兩之姦。先是臺御史江一麟請營田銀二萬。事皆下農部。農部議大略以爲前已減五年。至七年舊逋負。而今年賦稅又幸寬假其期會。而漕餉亦旣以其半輸金。頃復以部使者贖鍰五千。悉一切佐百姓之急。且法如是足矣。而今以營田銀爲請。則是郡縣以請賑爲年例。而地方亦以待賑爲成規。而況故事兩淮營田銀六萬七千兩。乃備開墾荒田者。不可直必如臺御史請請以一萬五千金予之。今所司以饑民冊請。而以青冊移

移部。備稽覈。襄時聚眾鼓噪。諸渠魁必令縣道殺無赦。奏對。上可之。

通州饑。竈亦不知其主姓也。戊子春三月雨。旣久。竈丁不得煮海。而百姓亦皆穿空。至食不饜糟糠。輒忍饑餓死。死不可得。輒自縊死。自縊死者常十二三。饑餓死者十七八。國門之外。死人如亂麻也。於是諸竈丁相與謀曰。吾等饑餓搶略亦死。等死。然寧搶略。搶略豈遽盡死乎。是日卽聚黨數百人。直走孫公廟。略彭取守等。已走蔡家店。略崔瑞鳴。因止舍北堤。欲入城。監門帥城上率銳砲如雷。復走北門外。略張祿。而

州守張和中。請於副觀察使胥遇。提邏卒逐捕。乃遂
逃走。武當山。略沙民陳恕。已復走張枝店。略沙民徐
有德。而會山賊百餘人。略邵志。而江洋諸倫。亦至南
江。略周昆。及景通傑而去。而是時。竈丁之衆。固已至
六七百矣。復略沙民邵雲。江一德。邵涇。殺恕。趙二。周
仕等。麥稻。殺周聿。一人。環漕河南北。桴鼓晝鳴。於是
狼山副總戎王有翼。皆備倭千戶顧世祿。百戶劉繼
爵。提餘東哨。哨總毛直。朱沐。逐捕。皆四面走。而州守
及吏目黃體振。亦詣各場。場中諸民。見州守至。復千
百成羣。竝匍匐悲號。於州守股掌之上。願明府爲我

請賑畫便計。州守既見諸民扶老携幼而來。皆菜色滿面。竝跪起。迭迎哭聲載道。悽然傷懷者良久。頃之復有兇酒使氣挾挺持刃。旁列道左者。州守故知此必鄉曲豪彊。特倚饑民羣輩爲姦耳。廼與運判楊瑞雲曉譬以威德。若等爲饑民。縣官當自憐憫。若等蚤爲若等計。有如直必爲盜賊行搶略。則請以三尺法繩若等。若等惴惴焉。兵在其頸矣。諸饑民皆叩頭稍解。散先是廷議。議欲令所司於賦役必多方調停。以蘇民困。於里甲必加意樽節。以惜財用。于賑濟必蚤爲區處。以安民命。而 上亦有詔。詔所司有能彌

盜安民及曠廢職事者不時甄別具奏於是御史
劉懷恕上書劾奏張和中等事下該部始所司
以爲搶略之後止於撫恤賑濟毋乃中亂民之姦而
幾令旁觀者效尤乎廼必大索渠魁請諭如法使亂
民皆凜凜於陛下威武聖神而後乃今而日知鼠
竊狗偷者而徒欲速自蚤斃也

贊曰

淮揚故北走長安餉道也而通州則東臨大海南距
長江疆吏可不謂任重乎至竈丁煮海爲鹽凡以佐
國計而奈何困於饑饉廼與江山諸偷相扇而起也

天子幸哀憐災民請蠲則蠲請賑則賑不然而重之以兵戈可乎孔子曰雖有粟吾得而食諸此可謂富而不好行其德者言也

饑民姜柰史存列傳

姜柰。崑山人也。已卯夏五月。蘇常大水。流殺人民以故。穀價益騰踴。而姜柰以爲吾不取諸富室。則亦有坐而自斃耳。於是聚姜柔。鄒津。鄒渙等。公行村落。劫人而奪之金。會伍長王沾。金周等。逮柰。與柔。津。三人就吏。而是時。吳江諸奸民亦擁衆至。鄉士大夫所許爲貸米。因略困鹿。而縣令王一元提邏卒逐捕。生得渠魁一人。亡何。都御史胡執禮卽以柰等梟斬。崑山市。於是請旂牌。屬同知王事聖。徧行閭閻。曰。若等第安之。上有詔。庠倉廩以佐若等之急。若等如不

自喜直必以一日之欲爲不軌。則府得以新法斷若等頭矣。先是御史林應訓奏水災。上有詔。詔所司多方賑恤。又謂朝廷惟恤窮民。不宥亂民。唯是道上搶奪。皆請論如大盜。卽梟斬以徇。於是大司農張學顏從臺御史議。議減今年租稅。以予貧民。是後給諫顧九思王道成及御史田樂張簡王藻皆後先上書。所以爲救荒彌盜策甚備。事下所司問狀。而大司馬方逢時以爲誠宜申明保甲。練訓兵壯。大司寇嚴清以爲誠宜簡省詞訟。禁止罰贖。大冢宰王國光以爲入計吏。誠宜毋科小民。毋貪富室。諸廷議良是。

上皆從之。明年庚辰郡國吏法當朝正月而蘇州守
李文實長洲令劉懷恕吳縣令郝國章崑山令程達
常熟令劉震臣吳江令王一言嘉定令徐上達松江
守閻邦寧上海令敖選青浦令屠隆常州守穆煒江
陰令胡士鰲獨不行以郡縣歲大侵也而是時給諫
請止織造尤力乎先是 大婚禮將舉 上遣中貴
人孫隆往蘇杭許坤往應天織造今 大婚禮既成
匡篚克斥廷臣皆以爲宜罷罷之誠便也

史存廬江人也先是江北兩雪愆期流亡載道百姓
至賣子鬻產以接衣食猶不足 上幸出帑金特遣

重臣儼然屏臨於廬鳳淮陽之郊。百姓如蒙更生而獨滁和之間猶未及也。而史存。霍朝武時忠孫燕等朝不保暮。安能待乎。廼決策。察富室積聚米稻者。廼祥爲買米。因略其稻。當是時。邑中子孫賢。盧東孫應彬。霍朝臣。富於穀。於是存略孫賢。朝武略朝臣。時忠略盧東。燕略應彬。頃之。廬江令燕自仁。使邏卒疏捕村落生獲。史存等八人繫獄。而御史楊一魁。御史劉懷恕聞而大懼。可知矣。即使通判周繼德。行縣虛倉廩。以予貧民。貧民數千人。望見使君旦夕至。皆匍匐迎使君。跪起爭扶持車轂。願使君生活我。幸爲我。

畫便計。繼德既至。會上元。亦罷酒。弗樂。旦日察下貧者。凡一千八百五十餘人。人與之粟五石六斗。已出史存等枷楔行村落。使饑民無效。史存。是歲丁亥春也。亡何。臺御史御史大會劾。奏廬江令殷自仁。上有詔貶秩一等。視事如初。自是之後。雷風響應。正月雪深一尺。二月復大雨。而百姓於是乎得以躬耕隴畝矣。

讚曰

塩鐵論曰。世之有饑饉。天之行也。禹湯被之矣。而何獨已卯丁亥之變。乃怪以爲大異乎。願上古積貯。弗

足異。王給諫請徐臨一倉。糗糧數萬石。附運艘載入蘇松平糴。至穀值輒以繇使送奉輸大倉也。此豈非移粟上策哉。余獨悲郡邑不講於積貯之策。卒然有變。至無以相恤也。

叛僧省悟列傳

省悟鎮江僧也。常居甘露寺。欲招致四方異能之士。陰圖不軌。是時楚鐵佛寺僧雪峯。善於白蓮教。方在秣陵。省悟以爲非此人莫可者。廼使使者至棲霞寺。約雪峯及滇僧大乘。於是與順天人黃恩。寧國人汪元洪等十人。結盟爲昆弟。黨類漸增。異志日熾。恩廼造符勅。稱勅封同時一心開國元勳大都督元帥。將軍。改年爲大明弘閏元年。屬比丘孤峯。劄劄。劄劄。旣成。卽議以昆弟十人爲南北軍。而以黃恩及黃仁。黃義。顧賓。貞靜。檄曰。北檄號用仁義禮智信。以元洪及

雪峯貞成蔡少溪元明檄曰南檄號用金木水火土
期以四月朔南軍起於報恩寺北軍起於天寧寺竝
發難自京師始共爲計畫欲先取鎮江以據要害然
後封府庫以備軍餉將軍法士民皆奉弘閏檄以自
別不則盡以其家室屠慘無遺類於是頒符檄而獨
慮丹陽人稀乃急使馬陵人戴元六與教師吳守禎
約約丹陽人爲內應而是時丹徒水兵錢山業已奉
符勅以待矣殊無意巡徼事而把總徐道召山問狀
山倉皇錯愕莫能對道大驚卽疏索得僞勅一道僞
符一紙以爲遺我者省悟也而教師謝朝選亦以所

受符檄。微言於丹陽尉包朝。卽與令長甘士侖。及丹徒令徐桓。丞孫應溪。議竝請鎮江守。王事聖同知高偉。因告於備兵使李頤。廼使邏卒收捕海注汪元洪等二十餘人。繫獄。法當死。已。咨南北諸郡邑。索雪峰黃恩等。是歲萬曆壬午也。而南司馬潘季馴。臺御史呂藹。孫光祐。御史林應訓。曾士楚。給諫萬象春。李國觀。及守備中貴人張廷。皆後先上書。事下大司馬問狀。而大司馬梁夢龍覆奏。大略恐有如巴蜀學伯貫之變。起於一朝。卒至攻燬數城。悔將何及。請梟斬汪元洪等。以徇。它一切脅從。皆恩貸。得毋死。上

幸從之。當是時。武當。泰山。五臺。王屋。烟火相望。而萬壽。廣善。二壇僧人。說戒。聾瞽愚民。而歲至三四月時。少長相携。潛赴白雲觀。布施聽講。傷敗風化。尤甚盛哉。而臺諫皆欲嚴爲禁令。令毋以左道惑衆也。

讚曰

以余而觀。國家令甲。僧道府不過四十人。州不過三十人。縣不過二十人。然必精通經典。給與度牒。奉有勅旨。始建庵院。其志念抑何深遠也。今天下佛教日隆。僧迫倡狂。以致省悟一比丘。乃欲改元建符。軍號南北。母亦好佛者。驕之使亂乎。朝子曰。入者主。

之出者奴之。且此屬卽人其人。火其書。廬其居。可也。

叛民帥嘉謨倪伍徐宗式朱漢卿列傳

帥嘉謨歛人也。邑故有絲絹銀。而會郡縣皆行條編法。歛至多五千六百有奇。於是帥嘉謨同婺人程文昌赴闕號泣。願盡便計。頃江子賢等再奏事。事

皆下民部尚書。尚書殷正茂也。廼咨臺御史宋儀望。屬兵憲使馮叔吉。徽守蕭敏道。雜問。廼以三千三百行歛以三千二百行歛。寧祈門。黜婺源績溪。上幸從之。先是嘉謨北首燕路時。里中爲治一介行李。甚備。嘉謨卽以橐中裝貲得冠帶而歸。里中旣聞嘉謨至。皆以彩幣鼓吹郊迎於國門之外。而嘉謨亦自以

爲大有功桑梓志氣揚揚甚自得也。五縣之民聞而
大怒可知矣。徽俗負氣自高爭於勝負每小不忍輒
成大獄。其至揖捫破滅門戶皆所弗顧。問五縣乃竝
鼓噪以爲歛。旣以賦橫加我而奈何復自誇詡爲平。
而是時徽州倅徐庭竹行婺源事歸府。百姓皆鳴鼓
張旗志遮呼道左。願爲五縣計。五縣自誓寧死必不
以歛故遽加賦。旣行至休寧。休寧擁衆數萬人鼓噪
亦如之。五縣由此與歛大相角持。道路喧嘩流言洶
洶。於是臺御史胡執禮下司理舒邦儒。御史鄭國仕
下兵憲使。及太守徐成位。趨令行縣咸與解散計欲

收捕嘉謨以謝五縣。及五縣渠魁重爲不法者戒。臺御史廼以其事奏請。上有詔。詔爲如果不便。自合申訴所司。或抱木陳。奏何遽聚衆鼓噪。逼脅求申。下兩臺問狀。時丁丑秋也。其後紘諫彭應時。石應岳及御史唐裔皆後先上書劾。奏大略以爲。殷司農爲桑梓地。過耳激而爲變。於是殷司農請告以謝人言。上弗從。始徐太守行休寧。休寧張旂幟。上大書以戶部操戶權。以歛人行歛事。大抵攻剽殷司農。是時太守卽一票一檄。必要人驗而後發也。

倪伍鎮江人也。先是上從廷議。聽郡國皆鼓鑄萬

曆錢。又著爲令。令舊錢兼行。第私鑄及與販者所在得請論如法。久之。江北私販者至。而漕舟亦還。所帶太湖私錢甚廣。常持錢赴市曹。橫欲易餉資餽。率之類。市曹皆不從。故事。新錢八文與銀一分等。奸民利低錢二文。折官錢一文。數多。便於插和興販。於是倪伍。廼與范梓。閔希德。謀曰。私錢不行。柰何不蚤爲地乎。是日卽聚黨千餘人。直走府庭中。而會太守缺。同知毛似蘇視事。疆欲以檄諭士民。令行低錢。是時郡倖楊棟行縣事。五等見棟至。卽強奪牌一面。欲府大書低錢。皆以二文折一行。不然者。五等羣聚府庭中。

擾擾不解也。府不得已。竟如五等所請。第書誓以二
文折一耳。梓等殊不欲以暫行爲令。乃將牌擦抹。並
鼓噪出府門。直走白馬。略米戶。馬受春耿介。不及什
物亡笑。已。鄧鑑介。並馳漕使者。茹宗舜。塩使者。本棟
所。擊鼓。口稱錢法不通。已走府。欲改移校聯。以便往
來。因請介繫縣獄。會門閉。介竟還逃走。五等遂上府。
樵樓鳴鍾鼓。府乃率刀細手守府庫。即使使者越城。
徵兵以自衛。是夜五等解散。已。鐘鳴漏盡矣。旦日日
出。復聚五千餘人。略商賈白晝大都之中。劫馮麻子。
而奪之米。當是時。米戶閉市。道路阻絕。城中饑無糧。

府乃以五百金買米給僧人入市。於是鹽使者漕使者。奏記部使者田樂。卽檄府逮繫倪五范梓等。令以低錢送官改鑄。趨開米市。市漕始亡恙。先是丹徒獄獄囚鄭汝真等越獄臺。使者孫光祐及部使者並劾。奏毛似蘇不法狀。事下天官尚書王國光頃壘奏。詔調毛似蘇簡僻。罰楊棟俸。凡三月。時庚辰春也。其後給諫王蔚及御史楊際熙亦上書大略以爲私鑄私販之姦。不獨鎮江。而江閩尤盛。欲重治范梓等。上有詔。獨責鹽使者及漕使者。急以爲御史以執法愆奸爲職。若縱罪徇情。緩急何賴。皆令還道。

候考察。始淮揚米價騰踴。私鑄不行。郡中口語藉藉。皆有狀。於是令以制錢十文當銀一分。私錢則以二十文也。

徐宗式建德人也。國初重屯田。欲犬牙相制。而建德於撫州。則屯四百二十三頃。八十一畝。饒州則屯二百五十二頃四十一畝。先是撫州戍卒胡梅林。侯三秀。王芝盛等。法當屯建德。軍一人田凡二十七畝。地凡三畝。能開墾荒蕪者聽。宗式由此與徐廷集。徐宗滾。及諸生徐文津等。阡陌相望。蓋自梅林曾大王父時。與式等相得甚驩。常佃軍屯。縣官每徵輸。悉屬

式等赴期會。久之。輸稅不供。所以累戍。率者至備。弘治中。遣科臣履畝。盡以所侵田給軍。亡何。復爲林等所侵。而江西屯田。賴僉事劾。奏事下兩臺。久未報。

今上壬午秋。詔郡國履畝。於是江西僉事使郭汝及徽寧備兵使程拱宸。馳建德。乃使池州同知趙秉孜。安慶同知夏子諒。南康倅尹厚。撫州倅蔡廷璋。屯田仰指揮。偕建德令郭壽。度田地二萬七千四百五十五畝。式等隱匿凡四千三百八十餘畝。地七百二十餘畝。蔡通判遂與仰指揮。卽以是日還省。而會戍辭卒候濟。高九州。竝爭屯訟。屯竟屬候濟。也九州。

不服。於是以九州及侯廷茂、鄒鑑膠致會城。旣行至橋口，道宗式門。宗式與徐廷集恐九州逮繫鄰省，遂發隱匿事。卽聚衆壓仰指揮，墜馬毆打幾死。廼奪九州還縣。賴臺隸解散。是時縣使使者王雲從逃至境上，左驗。頃之，仰指揮以其事請於江西臺御史王宗載。御史陳世寶屬池州備兵使收捕宗式及廷集。宗滾、宗煥、宗炳等對簿公庭中。辭服。卽移應天臺御史孫光祐。御史蔡夢說廼使使者履畝得隱匿凡五十頃。七十九畝由此請論宗式等。編發爲外邊塞民如法。是時備兵使程拱宸亦待罪行間而應天臺御史功錄。

史及江西御史賈如式後先上書以聞。事下大司農覆奏。與兩臺同大略。欲以建德糧使者屬江西查覈。上幸可之。詔程拱宸補支曩所罰俸如故也。

朱漢卿。鹽城人。壬辰秋。朝鮮發難。直指使彭好古上書請募兵。近圻凡五千。淮揚凡三千。山東凡三千。河南凡三千。大率一萬四千人。備海島。於是河漕右司馬陳于陛及鹽使者王明。移狼山副總戎張榜。招致郡國敢死士。而鹽城法當足兵三百人。縣令董繼祖守備使王誥。略於文移。以爲欲選兵一千。自邑中至。

村落無不人人惶懼唯恐各姓入莫府也先是寧夏之變。浙臺御史常居敬選兵入援。聞開傳以爲今淮兵俱入寧夏甚洶洶也。而不知備倭之檄布告郡縣。至大章明較著矣。而漢卿等相與謀曰。若不蚤自善爲計。則吾等數千人恐頸不足以當樵質也。是日卽擁衆三千。走縣庭中。鼓噪。明府幸以須臾之間。爲我焚燒花名文冊。不然。吾等與死。乃鋸之餘。寧死杖下可乎。縣庭見漢卿等以死請。曰。縣爲若等除名籍。若等第安之。毋擾。是時縣庭中深以獄訟簿書爲期會。卿等復欲請徵輸事。願寬假其期會。縣庭復如卿等

所請也。卿等始解散。於是大方伯張允濟以其事請於御史高舉。會滿歲。欲報命於上。屬御史曹楷新到官。管事。當渠魁朱漢卿罪。它脅從皆罔治。然後劾奏董繼祖。事下該部。始淮揚募兵三千人。議以遊擊一人屯廟灣。曩者欲僭倭。彼廼以爲欲援寧夏也。

讚曰

以賦役度田。錢法募兵。皆國家大計。廼起而與縣官抗衡。胡爲乎。語曰。毋爲福始。毋爲禍先。帥嘉謨以福始致禍。倪五。徐宗式。朱漢卿。則亦以禍先受咎。道家之戒。信非虛言也。余獨怪汪四屯在建德。往往有

以異省視之者。此殆非是。尺地莫非其有。一民莫非其臣。而況於軍政乎。犬牙相制。蓋所由來者漸矣。

叛兵陸文緒傳胎子列傳

陸文緒龍江衛戍卒也。先是刷卷遺有佐史軍識贖
銀。久之。佐史滿歲去。而軍識亦既它遣。贖銀皆亡所
存也。會縣官給軍餉。而旂手衛指揮使沙金乃請於
尚書潘季馴。欲乘軍餉。因而處給。尚書以爲不可。所
以禁緝之者甚備。而指揮劉喬竟以軍餉。竊置橐中。
三軍聞而鼓噪。乃以橐中金屬識字張愛士予三軍。
受士復欲每石扣減五分。於是戍卒陸文緒及周弼。
永住兒等數百人。竝匍匐悲號於尚書所。已走給諫
李國觀。已走御史劉光國。吾等小人。旦莫披堅執銳。

巡徼江上所志徒以饋資之故奈何予等金而欲以抵佐史軍識贖緩乎御史乃逮捕受士而是時指揮使府軍左則王時偉府軍右則吳允祿府軍後則王應祇金吾右則王元坤金吾前則劉光裕金吾後則韋堯羽林左則梅經羽林右則梁文元羽林前則陳平虎賁左則崔立天策則承應奎神策則馮恩孝龍虎左則彭舉驍騎右則張應宿留守左則劉應科鎮南則許明富豹韜則劉朝豹韜左則馬應辰水軍右則毛邦憲留守後則田弼牧馬所則王言卽以受士所封金盡予緒等而獨旂手趙文舉府軍魯應麟

金吾錢世孝。留守朱鶴鳴。孝陵韓廣。廣洋。張。潘。水。
軍左李漢。潘陽左張四維。虎賁右劉錫。留守右齊聞。
韶。留守前郭延祿。龍江右祈堯臣。龍驤李繼祖。鷹揚。
盧一官。典武劉用。江應。朱立。諸指揮。尚猶豫未欲散。
及科部檄再至。亦以餉金子三軍。皆一切無所遺。三。
軍始解散。時壬午十一月也。而尚書及給諫御史俱。
後先劾。奏其事。事下大司馬梁夢龍問狀。廼當王。
時偉等。故違部禁。而劉。張受土。乘機需索。侵尅兵。
餉。欲請論如法。因著爲令。令以後刷卷。卽於當罪者。
所。追鈎金。封輸縣官。上可之。於是寬假王時偉等。

罪而以劉喬等下所司逮問也。

傅胎子牧馬所戍卒也是時攢斗給月用糧糧紅腐不可食傅胎子等卽擁衆攘臂而起曰予寧不厭糟糠而柰何示人以不堪乎廼數百人請於御史黃仁榮給諫吳之鵬尚書吳文華乃罰治前所使百戶屠真授前事委吏利在粟腐因緣爲姦於是巡倉御史請倉所按驗凡紅腐甚者稍爲飾揚而地勢卑下者加行鋪墊而年久鼠耗者多爲寬豁使攢斗無所容其銖兩之姦廼卽編立什長禁喧嘩敢議法及不如法者皆連坐勿赦於是兵餉不治事在農部三軍

不肅責歸司馬著爲令。是時己丑春也。上從大司馬王一鶚議有詔詔所司嚴加約束。不許疎縱。自是之後隊長旣立其法森如也。每一予餉皆互相約束。唯恐有如一。人開隙輒不幸。卽染於事。旋至玉石俱焚也。

讚曰

秣陵之兵見告者數矣。雖逆節未甚著。然豈可使外郡邑聞乎。語曰冠雖敝不可加於足。履雖新不可加於首。此言紀綱不可亂也。今變者數起其原皆出於偏裨侵軍餉。遂至以履加首。悲夫。大司馬欲立隊長

嚴約束，復商君連坐之法。豈得已哉。

馬蹟洋爛洪口諸倭列傳

乙亥春。大汎故事。大汎橫海將軍提兵出海島。備倭奴。當是時。朱儀望爲臺御史。胡用賓爲御史。迺使備兵使王叔杲糧儲使舒化海防同知使熊汝器及總戎黃應甲所。以爲春汎計。至備而會倭奴。操三四十艇鼓行。行至馬蹟洋。鹵漁人一百有五人。我叅將詹廷傑等提兵疾力戰。斬首捕虜凡七十六級。縱火焚燒倭舟凡一十六艘。赴水溺死者亡筭。奪獲被鹵凡一百有五人。倭器凡四百一十有二。舵兵亡凡三人。官兵傷凡一百五十一人。自是之後。指揮使張肇慶

簡敢死士復擊破倭舟凡四艘奪獲被鹵凡二十二
人倭器凡一百六十有二舵兵傷二十七人把總李
應麒斬首凡三級先是嘉靖中汪直爲鄉導導倭奴
入犯大遭荼毒已竭天下財力始大創艾之今不終
朝破七八十之衆誠奇捷也。

爛洪口先是川沙把總黎弘敷聞有一倭舟舟中有
倭五十三人皆執刀陸行海上居民亦皆奔走走若
狂於是提兵壓倭奴戰道逢一白衣人披髮執木棍
立軍前令勿往今倭寇勢頗大徒往往無益也三軍
由此有懼色逗遛不前廼割前一人喬祥耳以徇趨

令進兵。白衣人見割祥耳。大自嬉笑。弘敷以爲阻撓。軍機廼下令斬之。旣行至瀾洪口。倭奴已遂逃。口中空無人。時庚辰四月之五日也。居一二日。總戎郭堅請於直指使田樂。樂竊疑之。下總戎問狀。總戎卽使謀者楊貴馳川沙。曩所謂倭舟。蓋漁舟也。漁舟從南洋失風。飄流而來。居民誤以爲倭。至皆奔走。當是時。謀者李金莊應奎。趨弘敷乘馬往。行至東門。逢川沙民胡四。倉皇立馬前。止勿往。弘敷卽劒斬之。殆所謂白衣人披髮執木棍者是也。於是直指使劾奏弘敷輕殺民命。寃哉誣之也。

讀曰

倭奴動稱造舟千百艘。此皆虛語耳。其爲費甚大。不易造。近以閩人導之。造重底。遂易行。異哉。馬洋之捷。犁沉倭舟凡一十六艘。潮口凡一艘。以余所聞倭舟。大者可容二百人中者。一二百人。小者四五十人。或七八十人。今之赴水而死者。曷可勝筭乎。要之江海之戰。非其所長。往往聯虛舟。張弱簾。而以空發吾之先鋒。蓋所從來久遠矣。

朝鮮梁承貴列傳

梁承貴。朝鮮濟州島人也。先是州守遣承貴送戶曹。而會大風。迅急飄舟至川沙外洋。當是時。橫海將軍提兵備春汛。戰陣之具。鉦鼓之聲。凜凜如也。而叅將黎弘敷。忽見倭奴。拏舟而來。以爲何物倭奴。僞桀敢至是。帥三軍。殊疾力執承貴等。二十二人。於是疏索舟中。舟中皮甲。皮袋。帽。草帽。髮絲帽。鎗頭。鐵鍬。鐵爐。無不畢具。而其人皆與中國絕相類。獨衣帶垂繭紙形。此爲朝鮮人。明甚。總戎郭堅。乃請於臺御史孫光祐。及巡江林御史。屬松江理范守已。常州理韓率善。

雜問卽使通事新五郎往譯以字。見承貴所賫牒文。果爲州守遣送戶曹。戶曹者。漢言司農也。戶曹必居王畿。而況濟州。居海島。輕舟可數日至北岸。與瓊崖等。其必非奸細。不問可知矣。於是議發置寢室。給以餽資。餽牽如過賓禮。汎畢。無警。然後遣之歸。以朝鮮奉我。朝正朔。獻見不乏絕故也。是歲萬曆庚辰也。臺御史孫光祐。上書以請。幸可之。而所謂濟州二十一人與俱者。承貴及玄奉仁。李根。彭蕭溪。貞夫。自元。許永俊。金豆。彥加。叱同。金自珍。尹彥。長命。質奇。於邑。連於叱同。任彥漢。連把好。李必連。山億。邪石金。

是也。

讚曰

以余而觀龔太史使朝鮮錄至謁先師廟記則未嘗不廢卷而嘆也曰嗟乎仲尼以萬世爲士豈欺我哉自太平館北過鍾樓至王宮之東門望見松槐翳翳樓臺隱隱此非文廟耶諸生執俎豆以時習禮其下殆與中華亡異使者梁承賁誠飄流而來亡它腸而我以過賓遇之此殆是孔子曰柔遠人則四方歸之殆謂此耶

浙江

大營叛兵馬文英象山昌國營叛兵何中列傳
馬文英大營兵也。先是倭寇發難。衛軍不足賴。乃幸
用募兵策得五千人。爲東西二大營。居會城。遊擊二
人掌之。已議罷西大營。遊擊屬都護已。給諫葉時新
上書請損餉。故事二大營兵。兵月食餉九錢。請裁爲
六錢。事下大司農。廼移臺御史吳善言。御史帥祥。是
日大會方伯以下議。而兵巡使王許之。深言戍卒皆
辭服。因欲兼給以錢兩臺如其議。覆奏。上可之。時
辛巳秋也。明年春。文英與楊廷用等聞欲兼錢。皆羣

起口語藉藉。請於兵巡使。及清軍使楊標。吾等旦莫提桴鼓立軍門。不避石矢之謂何。旣扣損我月食餉。而奈何復欲以錢蕪行乎。願爲我畫便計。標因麾之去。道已請於兩臺。能不以一錢及若也。英等皆曰。幸甚。是時二月已盡。當春汛。法營兵分爲八總。往嘉寧台溫。於是海防使馮時雨趣諸軍日夜裝將行。而會臺御史檄諸軍歸農。大方伯遊季勲復下令。欲蕪錢如初。諸軍皆曰。若是吾屬尚可言乎。乃並走部使者。張文熙。鹽使者孫旬所。已走王許之。所欲執許之。賴同寅救。諸軍竟鼓噪而去。而都護魯邦遊擊呂應陽。

告於臺御史。臺御史問諸軍亦何言。應場對曰。諸軍言。言實餉不足。非徒錢難用也。是日卽以檄檄諸軍得增餉。諸軍以曩常欲執兵巡使。懷疑懼心。曰。彼豈能終欲忘宿怨。忍置我等弗問乎。我等與其嘿嘿死杖下。孰與執一兵巡使死。並死何不可者。卽聚衆二千餘人。椎牛以盟。往索許之。許之先已聞其事。遂匿矣。乃持刀斧。擊破軍門。直走私署。略其橐中裝。因擁臺御史徒步至營中。毆辱百端。不可言。是時部使者使張文熙帥布政使遊季勲。劉漢儒。按察使郝杰。都護吳憲。往譬以禍福。而鹽使者孫旬。主事王謙。亦皆

並趨臺御史所。許增餉如初。不得已。已移許之所管事。屬楊副使標治之。諸軍始解散。於是臺御史上書稱不職狀請。予告。而部使者鹽使者及給諫王致祥李國觀吳之美御史郭惟賢後先劾奏其事。事皆下大司馬吳允問狀覆奏。詔免吳善言官。而以張佳胤視事。貶王許之秩三級。罰曾邦呂應暘俸一載。佳胤既乘傳到官。察見文英廷用滑稽多智。營中之事。惟兩人所指麾。廼使遊擊徐景星召兩人。於是兩人面縛詣軍門。臺使者方在便坐。進兩人庭中問狀。兩人膝行而前。稱死罪不容口。臺使者曰。吾寬假若。

若得以功除罪可乎兩人叩頭願如令。於是給兩人冠帶金錢令其爲先鋒。蚤入謁。兩人旣上謁卽匍匐趨出城告諸軍曰。軍門頗無殺汝意。若等旦日不可不蚤自來也。諸軍果從兩人言。並入城臺御史詳示以寬大。甚至察寒暑疾苦。先是把總孫嵩莫如梗扞文岡卽下副觀察使徐汝暘罰治。諸軍方幸臺御史務在收恤絕無疑懼心。上嘗有詔言倡亂者諒亦不過數人。乃微以檄授指揮使李承勲逮捕馬文英楊廷用及東右營陳德勝東中營方子龍東前營李文高東後營張賢西右營陳文浦西前營吳章成西

後營廬州到官。暴以民變立功者赦。是日臺御史大會布政使舒應龍、李汶、觀察使徐元太、副觀察使徐汝賜、顧養謙、都護常鐸。王接武鞠問辭服。卽奉旂牌。屬都護梟斬轅門。諸軍復皆疑畏。臺御史乃使遊擊徐景星、龐溟告營中曰：「毋畏，法如是而止。」諸軍皆北鄉叩頭謝。陛下不殺以爲威。時三月初二也。頃臺御史奏請。事下大司馬梁夢龍議覆。詔稱：「張佳胤定禍勘亂，茂著勞績，轉御史右丞。賜徐汝賜、顧養謙秩一級。徐景星、副總戎秩王湏道。徐九章皆鎮撫秩。龐溟金八兩，李承勲、江應龍皆紀錄。金九五兩。」上

廼令該科覈激禍釀患者。而屬臺御史爲善後計。其
後給諫張鼎思劾奏。與大司馬同。上免吳善言官。
爲民游。李勲王許之。閑住。貶郝杰。楊標秩一等。左遷。
呂應暘罷斥魯邦。陳文澄還衛。詔書曰。近來文武
官以苛暴刻削相尚。其行類失人心。比遇事變。又皆
束手無策。倉皇首鼠。數法辱國。殊可痛恨。以故簿責
始之者深也。初部使者孫旬。上善後十策。於是臺御
史復大會布政司劉漢儒。觀察使郝杰。叅政使劉世
賞。王湘。吳自新。叅議使唐本堯。顧養謙。副觀察使劉
東星。馮時雨。陳澗。楊標。徐汝暘。僉事使許一德。李宗

曾議大畧以損餉汰兵馬不便計莫若復左遊擊及
各色把總因請總戎居會城故事團操軍五百人皆
土著而以把總一人掌之惟杭嚴兵巡使所調度已
調西營兵備城池今報罷選杭州前右衛兵五百人
偕團操兵大率一千人分爲二總屬都護巡徼於城
上歲時擊刁斗以自衛凜凜如也

何中昌國營兵也故事昌國營在象山海隅其廩食
該總請於備兵寧紹者移府庫金錢屬縣令偕把總
頒之而會傳好禮爲御史滕伯輪爲臺御史廼與象
山令約約月以二十五日爲期會丁亥冬邑令陳天

祥以它故。冬季不及予。營中見爲米價騰踊。皆口語藉藉。柰何不蚤予。而使吾等稱貸於人。徒以充子錢乎。是時備兵使劉尙志。微有聞。卽以檄譙讓令。令乃以其金計人十爲一封。大率二百三十有五封。使委吏陳情。送奉至把總劉光元。登堂開封。封皆少錢七八。何中等益鬱鬱。乃鼓噪而起曰。何至是。乃欲縛繫情。光元示以軍法。甚不可。令情還。何中奮而前曰。釋之。幸爲我致聲陳使君。吾等必不欲損毫釐也。情還具以實告。令廼增金。使佐史兵諫給諸軍。諸軍始解散。有頃。備兵使逮捕何中等。鄒鑑致臺御史繩

以軍法。於是兩臺以其事劾。奏。事下大冢宰楊巍議。以爲陳天祥當免官。詔可之。時戊子夏六月也。

讚曰

傳曰。有功不賞。有罪不誅。雖堯舜不能以化天下信哉。是言也。今兩浙七載之間。見告者數矣。以余所聞。諸軍縛叛民丁仕卿功未賞。而會城象山亦皆以損餉發難乎。上廼赫然怒。激禍釀患者。誠可謂至察。公明儀曰。宜若無罪焉。曰。薄乎云爾。惡得無焉。豈爲會城象山而言也。

上虞叛民丁仕卿列傳

丁仕卿上虞人也。少學書多通字藝。尤工珥筆。閭里有獄訟之事。必就問卿。卿爲人有機謀。膂力絕倫。欲招致四方亡命而爲亂。常託名塾師。往杭。杭人多以僮子從之游者。久之。浮沉間閭。因往來公庭間。竊有司之權。已廼交驩江上諸偷盜。欲逞不軌。殊不利於火甲。遂與鄉人韓謹等議。議欲變火甲法。謹以爲可。於是群輩請於部使者張文熙所。屬同知杭州吳日強問狀。而鄉大夫沈厯謂火甲不宜罷。仕卿由此鞅鞅。怨厯入骨髓。廼相與謀曰。盍乘是隙而起可乎。是

是保甲最嚴。徼道建更樓。校聯植鐵懸猷。夜半樓頭鼓發。分更髡如也。吳二守常從邏卒巡徼道。上三更不至者。罰金一兩。二四更不至者。罰金五錢。城中多怨望。皆欲附卿。卿遂聚黨至千餘人。毀其更樓及校驛。直走厓所。縱火焚燒其屋居。及西湖遊舫。然後盡略橐中裝。而賈人唐致思携萬餘金居厓旁。亦鹵略亡遺。而仁和令陳良棟。錢塘令孫琬並馳救。破圍漏盡。兩人微服衝圍始得出。時壬午四月二十九日也。會臺御史張佳胤。上有詔許以便宜。不俟會推。

陛辭竟乘傳鎮浙。既行至崇德。僉卒聞之大驚。卽檄

縣道傳次。以五月朔到官。而部使者方收捕仕卿等
四人。榜笞之二十。枷桎以徇。韓謹等擊牛酒。益聚黨
二千餘人。頓足而嘆曰。卿旣被逮。吾等若不蚤自善
爲地。則當隨坐矣。於是並鼓噪而走卿所。毀碎其枷
而去。卿好謂謹曰。禍日益迫。不可須臾待也。願勿去。
是夜。夜漏十三刻。復聚黨鳴金鼓。張旂志。圍繞部使
者。部使者開戶趣三司至。曉譬者再三。於是臺御史
躬馳部使者所。卿等望見臺御史。麾蓋將臨。退而還
遶道左。稱願罷火。甲不容口。臺御史許諾。令旦日具
以實告。卿等叩頭。詳爲解散。實與江干諸太盜有微

謀特藉口於火甲以自便耳。卿廼益挾城中戶男子一人。槍刀一副。燈一盞。分道而出。乘風縱火。火益熾。延燒鄉大夫少卿陳三謨。御史柴祥。孝廉莫曆。賈人江洪等四十餘家。家產金銀諸什物。略者亾筭。而是時富室欲自完者。皆躬自治。請卿蚤臨。然以請而至者得免。不則受禍益慘。馬通政。陳御史。家常築臺。命庖人擊鮮待卿。卿至。果登臺。金銀列左右。臺下鼓吹樂作。妻子膝行而前。跪起。請死罪。卿喜下令。令諸偷母擾有頃。召謹等議。議欲殺略城中幾盡。然後劫府庫。釋獄囚。出城。先是卿有令。城外治樓舡待諸偷渡。

以故水濱舳舻相望。其爲不軌類如此。於是部使者
及布政使遊季勲。劉漢儒。叅政使劉世賞。觀察使郝
杰。副觀察使徐汝暘。劉東星。楊標。都護魯邦。議欲請
大兵徃征之。臺御史以爲不可。前是東西營馬文英
等發難。臺御史因使遊擊徐景星召東西二營管長
令捕斬仕卿等除罪。由此營兵皆椎牛誓欲捕仕卿。
初臺御史有檄諭仕卿勿亂。仕卿竟毀棄其檄。兩臺
廼旦莫坐堂皇。赴杭州守劉伯縉及仁和錢塘令。令
其部署戍卒。當是時。臨安。海寧皆畏吳二守度田嚴。
臨安業已大書激變於門。海寧則羣聚安國寺。皆欲

僂辱之。而富陽尤有窺左足而應仕卿者。兩臺以故示良民。毋得脇從仕卿。仕卿勢益衰落。於是我兵擊其惰氣。殊疾。力捕獲仕卿等生口一百五十八人。奪獲器皿服飾。亡筭。因以篋輿膠致諸生口軍門。是日臺御史大會部使者。及三司臬。斬韓謹等五十二人。杭州市會莫而以丁仕卿等一百六人繫獄。旦日復欲行刑。又念殺僂過慘而止。廼出仕卿等以軍法加笞。凡百餘。卿嘆曰。嗟乎。吾以蚤發及此。及此。豈非天哉。於是卿等皆後先瘦死獄中。獨沈孟學等一十一人。以悼不及刑得除罪。臺御史奏於上。幸下大司。

馬梁夢龍既覆奏。上謂張佳胤忠績卓異。朕心嘉悅。賜大紅紵絲飛衣一襲。銀二十兩。表裏二之。張文熙銀二十兩。表裏一之。劉伯縉等紀錄。吳日強罰俸凡三月。其後臺御史劾日強竟免官爲民。是時郡國皆以嚴酷爲法。詔謂有司不體朝廷。保惜小民德意。徃徃務爲刻虐。博名歛怨。欲兩臺申明訓飾。意在寬和可知矣。久之。給諫張鼎思劾奏總戎吳國而吳之美。謂兩浙接壤金陵根本重地也。獨慮武備單弱。而御史陳功爲善後計。欲捕盜之中。寓安民之意。催科之內。兼撫字之仁。于有年以爲從亂者二千餘。

人。今捕獲尚未及什一二。宜著爲令。令被脇之衆咸與維新。仇怨之家不許妄訐。以安反側之心。事皆下大司馬。而會部使者孫旬亦上書陳善後諸計畫。語在奏疏。於是大司馬議收人才。定疑貳。大司農議平徭役。清追併復民兵。恤運軍。僉旂甲。皆如部使者所請也。

讚曰

以余所聞兵民兩變。皆倉卒發難。其倒置不旣甚乎哉。是時治道尙嚴。而陳御史以爲有司奉行太過。裁削太甚。豈不然歟。丁仕卿起自亡命。而響應者至二

千餘人小民可謂无解。然皆旋自滅亡矣。非陛下
聖神威武所變化。烏能然乎。

叛生張綺呂協祖列傳

張綺。上虞人也。已丑夏五月。縣大札而加以枯旱。民情洶洶。諸生三老。乃請縣令蔡汝達禱祠山川。能興雲雨者。不驗。而卿大夫金柱。張承賚。諸生張綺。薛于中等。坐縣令禱祠不敬。因告於部使者蔡系周。言縣令常無故擅殺人。有頃。汝達亦言承賚等。常以私謁干縣。縣不如所託。趣反唇相稽。柰何而欲以諸生奪縣官之權乎。先是。呂村觀音大士最顯。汝達躬迎大士至城隍廟。居四五日。復不雨。柱等以爲此明府不徒步而膜拜。大不敬。以故大士不以雨應也。而諸生

金彥宣等遂聲欲疆奪其大士而去。已封閉廟門。與縣令爭論不容口。久之。部使者案兩造屬郡太守。問狀。汝達廼乘小輿往謁太守。而諸生張綺。謝嗣祿。金彥宣等偕蒼頭杜德。一厲堯二等擁衆數十人。毆達傷其右手。裂白袍。賴蒼頭蔡勤。蔡順救得解免。然勤與順擢髮被毆者數矣。於是汝達以其事請於部使者。何廼衆毆辱我於市。至此極耶。頃會稽總甲金棟。羅卒陳元等亦以其事告郡太守。與達所稱同。金柱乃謁備兵使劉尚志。分巡使李國士曰。上虞之變實柱爲之。而僉事張承登春秋高。列名姓居首。及所坐。

諸生八十餘人。皆不知故。柱敢以身就獄。毋染及無辜也。部使者乃屬紹寧台太守雜問。久不報。竟以其事奏下御史大夫。明年春。部使者黃鍾覆驗達所榜笞石輅上。竟至死死在杖後。復數日。死於病。它所刻臧私亦以左驗。而獨金柱有請謁副札尚在。金柱故副觀察使也。於是御史大夫以柱及諸生薛于中。葛煥。法當革衣冠。蔡汝達貶秩二級。詔從之。

呂協祖嘉興人也。壬辰春。嘉興秀水令缺。而郡倅范鳴鳳行縣事。徵輸甚急。諸生呂協祖。金九淵。周學義。張惟恂。卜宗太等。常欲搢闕狹。與民相假貸。因請於

倅曰寬之。母甚苛猛也。鳴不從。已用佐史田見龍言。譙讓協祖。協祖遂攘臂而起。窘辱鳴鳳。頃與三學諸生約。約至明倫堂。於是奪卯簿唱名。並拜謁先師。因去衣巾。從此吾等其爲亂民乎。卽歃血殿中。乃奉牛耳而盟曰。范鳴鳳殘民已甚。吾等共鋤而去之。所不如約者。有如此盟。是時賀燦然。徐名世。項從先。不欲與盟。協祖多至陵轢之。由此瞋目張膽。設櫃歛費。雖下貧亦必治金。而學博周廷才。高座周允。日夜禁諭諸生不可已。因上飛文於學使者李同芳。然兩邑公門久閉。而郵使文移往來。郡縣皆械封不敢發。如

是者一句。自此之後。協祖等益暴橫。亡忌。廼作捲堂文。刻木龜以號動邑中。邑中應而和者四百餘人。會嘉興倅方玘。視府事。欲繩以文法。亡從也。於是兵巡使劉孟雷理論。始解散。久之。請於部使者李以唐。臺使者常居敬。乃上書欲以渠魁呂協祖等一十餘人。請論如法。調范鳴鳳簡僻。而給諫劉爲楫。亦上書大略憂紀綱之不振。語在奏疏。始學使者以檄諭諸生。諸生乃大言欲三從也。李御史從中論之曰。柰何以士人而制進退之權。以喜怒而司賞罰之柄。以一時之私忿。而壞百世之典章乎。

讚曰

以余所聞。苗給諫朝陽。所條對禁諸生法至嚴。何上
虞嘉興之變。輒起於肘腋也。傳曰。非公正不發憤而
遇禍災者。不可勝數。張綺。呂協祖等。豈皆喜犯不韙
哉。要亦我有以激之。善哉乎臺御史常公。所謂起于
因循。而壞于蒙蔽也。

楊文學列傳

楊文學。歛人也。少失父。孤落魄。而會蜀道李宏至學。因從之遊。習黃白。棗陽王常浮慕其術。招致府中。無所成。亾。抵於揚州。久之。往來嘉興松江之間。專以鬻藥爲務。先是雲南人鄭喜。少從父鄭二十五至秣陵。因奄割。給事李侍中。亾何。李侍中。不幸捐館舍。喜復留落至松江。寄食雲間葉小山。適文學見喜。因與之語。大悅。悔相見晚。喜乃詐稱石城王內侍。王幸遣我與鄭彩往松江。倅周廸所。而學亦詐稱我故寧王苗裔也。生平無它長。獨精於黃白。橐中得不乏絕也。喜

曰。小人願從王遊。惟王所左右。由此學稱寧府散誕皇矣。而猶恐爲縣道所窺識。亡驗。於是察省祭褚春源。善剗。乃送奉錢三。因刊木關防曰。勅封寧府散誕皇。已刻雲龍花欄牌式。皆用紫粉刷印。因爲刷批書曰。寧府散誕皇。今差官舍張廷用。前往蘇杭等處收買段布。進府供用。如遇關隘。即便驗放。學卽以硃札標判。儼然若一王公云。是時休寧人朱岩龍以轉輸皇木乏資。因稱貸於邑中子陳東台。亦至小山所。與喜語之。故喜曰。我主親寧王後女。可治禮謁王。吾爲公從中遊說。則何難於千金哉。於是謁學。執禮。

甚恭。有頃喜乃具以實告。學許諾金三千。是日卽立券。俟還府而後與也。然喜已先得金二十有三兩矣。而吉安人劉永期亦以藥買至喜所。陳說亦如之。期乃以爲果寧王後也。頗雅重學已。喜因言橐中金將盡。令期治裝同往杭州。至日我主卽以子錢報女。女請勿疑。期曰此王也。誰謂難於金錢哉。自媿弗能多予。予金一兩四錢。它僅遺枸杞子三十二斤。買可得金六兩六錢。并皆與喜。而王宣亦休寧人。與岩龍同事。因從學行。行至塘棲。群言病。曰姑假民室數日。病愈往。而諸生沈定先乃授之室。是時永期已託名。

爲舍人矣。行間逢李洪。洪乃與岩尤同閭閻。具言稱貸事。洪因遣蒼頭楊阿六嚴事王母。失王意。時壬午上元也。是夜學偕喜等微行觀燈。而市井人王山、魏東、訶知寧王後。因使樂人李二、擊鮮治醇酒。請學等爲布衣之飲。於是學等往飲。飲不至數卮。樂人擊鼓歌吹。敖戲如生平。而會何鏜、蔣榮亦過。李二而學等皆被酒大醉。坐上座。至貴倨。鏜惡學等不罷酒爲禮。怒罵喜。乃拔劍起舞。因推席視永期。永期執榮毆傷。幾至死。總甲朱文見學爲王子。恐事大。令榮與鏜。旦日持羊酒禮請罪。鏜果如文言。趨榮。榮貧甚。無能治。

具。鏗廼治魚肉糖餅四盛。因文爲紹介。謁王。叩頭堵
下。曰。以卮酒積過失相爭。爭時急。實不知爲王。有死
罪。學曰。此往事。何足介意。鏗跪起。叩頭謝。度王無怒
意。卽馳王山所。與文並索榮治禮費。榮見鏗等逼迫
甚。束手無所告。夜半廼自縊而死。旦日榮父蔣富告
於張倅所。卽使使者逮捕喜。喜竟詐稱中貴人如初。
於是屬鍾巡檢按驗。榮果輕重破傷。皆有狀。文學始
惶懼。恐事不可解。乃與喜及永期議。議與王山貸銀
五兩。旣得金。卽買冲天冠及紅袍香帶。以學不時冠
帶衣履。而稱散誕皇。因偕喜走杭州。館於錢立所。乃

大書書札稱名。復詐多變。多變者。石城輔國將軍拱
概第九子也。於是屬喜永棋。岩龍上謁部使者張文
熙。熙廼謂若王子何得無故至會城耶。即使使者逐
送至境上。廼先令鄢照磨杜經歷。遲學於接待寺。詣
其橐中。裝以察真僞。於是盡得曩所爲僞印批文及
冠帶什物。皆僭竊不軌。亟馳報劉太守。太守以爲令
甲無散誕。皇封號。而况寧王本逆藩。安得子姓再封
王爵。此必詐僞無疑。并皆捕繫公庭。鞠問辭服。太守
恐學以畏刑而服。是日即使使者問石城王。王曰。吾
第九子多變久物故。今已一十餘年。而况故事宗室

不許私放債利。豈有滅絕枯稿遊魂。放錢異郡之理。柰何文學誣死者以不法乎。於是大會觀察使以下雜問。廼以文學請比詐假官者律斬。而喜及永祺王山等。輕重罰治有差。而臺御史常居敬。御史張文熙。以其事奏。詔法司從重擬來。其後大司寇以爲宗藩各派皆屬欽名。今文學乃敢冒稱情與詐傳詔旨者等。請梟斬以徇。詔從之。獨鄭喜令照例改擬。然後引弘治十五年。詔曰。今後敢有私自靜身者。本身并下手之人處斬。鄭喜於是乎就刑矣。四方郡國始知曩者道上散誕皇故文學中貴人故鄭喜也。

讚曰

孟子曰天子使吏治其國而納其貢稅焉。豈不萬世治宗藩長策哉。夫以此爲訓而諸侯王猶有馳馬出行郡國者。其弊乃至有如楊文學抑何愚與。余獨謂劉永祺王山等不當信若是。奉之如王公。然皆愚人卒自愚也。悲夫。宸濠之變。與漢七國。亡異。說者尚何稱於後。而云子姓乎。

崇德強賊梁翰列傳

梁翰崇德盜也。先是崇德丞王爵帥繇使戶轉二千八百七十金。道仁和瓦窰頭。會大盜梁翰譚金林思成等一十三人至。盡奪而略之。於是爵頓足嘆曰。嗟乎。此天子帑金。柰何中道而充偷盜囊橐乎。縱上官幸而哀憐爵。不加斧鉞。爵何面貌居。陛下疆場也。乃赴水而死。自此之後。縣道日夜提邏。平部索邑中。生得梁翰譚金林思成吳應龍王守義李六楊鳳七人。已復得陳元功鄭華楊四三人。是時洪雨。鄭華爲保姦。并皆逮捕到官。加以析楊。翰等叩頭服。實有

之問其金。尚存二千五百有餘也。已鉗鉞雨及華。又得一百金。獨陳七王立趙龍兒。遂逃不及法。於是臺御史徐斌以書劾。奏指揮張誠千戶李柵事。下大司馬譚綸。請貶張誠李柵秩一級。梟斬梁翰諸賊崇德市。

讚曰

賢者誠重其死。爵殊媿奉使無狀。乃死也。嗟乎。山障間盜賊公負勢自有之。爵獨懼其鋒哉。孟子曰。可以無死死。傷勇當盜賊擾攘時。尚負罪引愆。何夫日之難。猶思復鳴乎。

嘉善強賊列傳

嘉善強賊其姓名不可聞已。庚寅冬。上海以京庫銀一千二百餘兩。使倉大使蘇刺轉運。既行至嘉善。會強賊數十人。從道左出不意。略八百四十餘金而去。是時同知曾維倫視府事。廼好謂巡徼倅方玘曰。主臣。吾等典司疆場之謂何。廼辱帑金。一旦淪於偷盜之手。於是各以俸資。及贖鍰如數封輸使者。是日卽提邏卒。大索邑中。以爲得其主名。因席藁請罪於兵巡使方萬策。然後以其事報兩臺。柰何偷盜竟不可得也。久之。臺御史常居敬。及御史黃鍾韓介聞之。以

爲賊奪轉運金至八百。廼不以告。豈以爲細故耶。於是誰以書請事下大司馬問狀。而大司馬石星以爲巡徼倖方玘及縣尉黃茂懷法當首論。是時曾維倫新視事臺御史。御史請與兵巡使量加罰治。上有所詔。罰方萬策俸凡三月。曾惟倫待罪行間。必欲得主賊而後可也。

讚曰

以余所聞兩浙事。皆大異。使者轉金至嘉善。廼疆奪其大半而去。母亦以兵民交變之後。法令稍緩乎。不然。曾一守故優於吏治者。余嘗從吾邑中。見其以司

理行縣事。每一閱操。戰陳之教。鉦鼓之教。頗精明。余
以爲異時誠可當一面。廼何有強賊數十哉。

江西

花園洞陶紅李白列傳

花園。廼走撫州道也。行至西口。利用度會。舳艫缺弗可度。道上諸行人。皆涉白田上雲山。時有到花園者。罕而希矣。於是陶長壹洪堯玖李明壹白強捌崛起。花園。花園居進賢縣東。旁近東鄉。南旁近臨川。岐徑若綫帶。群山複障。若城垣而四維之。今其下林木益茂蔚。徑路僅可通一竇耳。諸酋巢居中。水寇則以鄱湖爲淵藪。陸寇則以清泥爲羽翼。隆慶初。強捌等常私造鳴鏑。流矢諸閫器。欲反。聞槌師傳勝技至高。廼

坐勝東鄉。拜執弟子禮。師事之。既得其道。擗等益無忌。卽公行南昌進賢東鄉。臨川諸縣。得艾煥。擗。白朝。拾等爲保姦。廼畧王堯貳。王亨肆等家室。殺邏卒鄧京。胡長。柴。及比丘傅清等數人而去。於是守巡使柴淩。袁隨。徐用檢。徐時可。馬時泰。及偏將倪中化。請於都御史徐枋。而以裨將陳仁海爲將軍。軍清泥。胡裕爲將軍。軍鄱湖。群爲備兵。堅壁而守。士卒又皆閩匿。示之以寡。無剿意。第微告保姦故。因懸重賞。使保姦爲內應。是時鄉人何乾貳。願爲鄉導。欲滅此四族。而後朝食。廼引令黎邦琰。尉丁景芳。提兵三百人。鷄鳴。

而駕出諸偷不意縱火焚林木會大風延燒至巢火光燭天諸偷倉卒起不備多自絳騰蹂踐死於是裨將楊秀樂生得徐國貳等三十餘人王汝蘭生得洪堯玖等十餘人陳耀生得白強捌等二十餘人胡清生得彭十三黃奇生得陶長壹等十餘人皆篋輿膠致軍門下南昌司理沈楠撫州司理余懋學卽訊而李彪五等男婦八百三十餘人盡衿甲面縛請降於是編立保甲桴鼓不鳴是時隆慶壬申冬盡也大司馬譚綸按牒奏覆於上詔梟斬白強捌等以徇其後御史燕儒臣勘功書旣奏賜徐弼金三十兩表

裏二之。袁隨等二十金，胡鳳等十金。初清泥花園皆重鎮。嘉靖末，清泥置巡檢使一人，杖乃請比清泥故事，置巡檢司。詔可之，賜名曰花園巡檢司。司以左杖復令梓人置公館，而於西口縣買舟爲渡。於是花園之塗，車擊轂，人肩摩，殷殷不絕也。

讚曰

異哉花園諸寇也，而以陶紅李白爲姓乎？嘉隆之間，號爲慄慄，而邦琰乃以一令公提桴鼓往，不終朝縛矣。何乾貳鄉人也，亦能以其身試蠶爲梓里除殘蠹，豈不壯乎哉？

建昌諸盜列傳

建昌諸偷其姓名不可聞已。乙亥冬諸偷常從江上鼓行至建昌見爲藩封重地曰有如一日得食王足吾事矣。會歲杪監門皆解嚴諸偷微行走城中直擣王所果得王縛之於是奪其印盡取其財帛復縱火焚殿宇而去。是時備兵使黃可大及太守陳吾德邑令鄭時章帥邏卒日夜巡徼江上部索諸偷自初捕通歷四月矣賊不得而分守使王乾章在南康廼亦簿責饒州判喜僉守禦使孟應越邵繼芳鄱陽尉徐鳳瑞急久欲馳報臺御史御史恐繩以文法皆大懼。

以爲得偷盜諸酋。猶可置辭以對。不則備守之謂何。低徊者久之。始報。而教授張其山。先已移文請矣。於是臺御史楊成。御史張簡。及巡江臺御史王篆。給諫裴應章。後先皆劾奏可大等。及長史湯明善罪。事下戎部。而大司馬譚綸請復論之。上有詔。罰楊成。張簡俸一年。左遷黃可大。陳吾德。邊雜職。貶王乾。章。鄭時。章。秩一級。下喜僉等御史逮問。是歲丙子也。明年春。御史張簡。輕重當喜僉等罪以請。上免喜僉等官爲民。孟應越等貶秩二級。先是簡奏長史罪。上謂長史何罪。原爲道府阻遏。不令申報。詔復長史。

職而可大等。竟坐法免。

讚曰

古者名山大澤不以封。建昌豈非名郡與。盜入城。縛王而奪之印。寥寥久不報。何哉。陛下怒而譙讓之。誠無辭以對。以余所聞。建昌王賢王也。好學稱醇謹。母亦慢藏誨盜。或時有耶。

流寇羅朝廣列傳

羅朝廣江以西流寇也。丙子夏五月。常帥其黨百餘人至寧州。界所過必僇殺。人以示威重。於是分巡使王徽猷自南昌馳寧州。誠亭長堅壁固守。勿令至界上。界上兵衛甚嚴。弗可入。諸偷皆解散。獨廣與徐武楊青山等三十人約曰。吾與若等亟分爲三。不然就禽矣。武走楚。廣與青山等走桃林。九嶺。竹子嶺。亡何。楚執武等七人繫斬獄。而青山等復亡抵於萬載縣。黎源天井窩。頃廣復使彭生七微行謁寧州。爲把總戴素亮所生得。言賊實久遠徙。由此分巡使馳還南

昌矣。居月餘。青山等遁。自黃栢山入靖州雙坑。明日。桃源哨邏卒陳俊。鑒山等戰。殺俊及詹作。王乾。王子先。張忠。明日。復入噪坑下洞口。殺我兵舒元。陳有金。陳祿。復縱火焚陳宿六屋居。明日。復入金鷄橋。我義士吳鳳笙殺四人。兵李興旺殺二人。而賊亦殺傷大當。明日。復入黃崗。殺我兵四人。剖取吳鳳翔心肺。然不過數十人耳。是時臺御史楊成已轉遷去矣。而潘季馴行至廣信。新授事。會分守使盧仲佃從。卽下令徵鄱陽守備鄧子龍往擊之。先是徽猷移直指張簡。稱盜賊寧懿。亾何寧靖。又見告矣。簡劾奏猷隱蔽。大

畧謂猷不當居南昌。故事。南昌無兵備使。前都御史御史以寧州介在武寧靖安之中。叢巖疊障。廼請分巡使兼兵備使秩居寧州。以故論猷獨重。而當南昌倅袁祖義寧州守陳以忠。吏目柳益靖安令朱玉尉趙不昧。罪與都御史所劾奏同事下戎部。於是大司馬譚綸請輕重案。徽猷等罪。上有詔。詔王徽猷閑住。袁祖柳益趙不昧。竟坐法免。戴素亮下御史逮問。復申之以令。令兵備使專居寧州。寧州於是建大將軍。旂鼓兵士。日振甲介焉而馳也。

讚曰

以余而觀羅朝廣。稱爲山豪。猶不能克。何足置齒牙
間乎。顧寧州在萬山中。地接華林及楚服。有如一且
盜賊流劫。山棲草藏。必此間矣。勿謂毋傷。其禍將長
嗚呼。戒之哉。語曰。一人守險。千人莫過。此可爲寧州
道也。

平安遠賊葉楷李圓郎列傳

葉楷者安遠人也。弘治初曾大父阻黃鄉以爲險。延引至楷。凡五世百有餘年矣。生三子。長盛乾。次盛坤。次盛和。楷有族弟曰槐。慆悍尤甚。而所居黃鄉雙橋南橋八副腰古頂山。勞田保皆在巔惠汀之中。峻嶺崇峒。盤牙數百里而廣。其下有田一十八萬。自上世以來弗輸賦縣官。縣官莫能禽。亡何楷常凌鏢諸偷。諸偷心竊怨之。謀欲屠滅楷。廼相與謀曰。與其爲葉氏所魚肉。孰與爲天子治氓。得受一廛。歲時奉賦役。寧不愉快乎。是日卽率父老子弟數百人踵縣庭。

叩頭。吾等小人願降。請以其地爲縣。楷聞大怒。欲誅諸降民。諸降民微以告劉載。永有如將軍。一日提兵至吾等。從中起內應。此滅葉氏一時也。將軍果如降民請。徃正之。卽下令曰。非葉族者弗斬。以故楷長幹皆散走。應我兵。楷度勢益孤。弗敵。激烈自縊死。我師逮繫其家室。因與諸降民犁其庭。掃其間。卽於安遠馬蹄岡建縣。而都御史江一麟具以其狀。請於是上。賜縣名曰長寧。是歲萬曆丙子也。先是諸偷鍾廷隆。鍾廷寵。陳侃。陳璉。楊才亮等。爲楷長幹主田租。常專以爲已利。一旦屬漢吏弗便。常欲反。顧未有機耳。

會嶺北守巡使張仕佩朱茹使贛州司理賴萬瑛及
會昌簿黃玉湖定南尉張尙禮度措田瑛行至石溪
保館駱萬忠所而廷隆等廼聚黨數百人鳴鼓張旗
志直走瑛所執瑛縛致巢傷手殺保民十餘人皂隸
二人居四五日解縛瑛始還縣初玉湖至勞田保保
中人具爲訟訟于湖以爲府先使散官尹明遂劉載
求等訪措故田宅奈何謾欲取吾等金錢吾等不與
而載求遂指不與者田以爲棄田奈何幸爲我達大
府毋令得敗吾等也是後瑛久居保保中見載求討
得售以爲始吾與求等約何如今賊背而求等皆受

上賞。獨吾衆以載永故。柰何欲沒吾田產乎。遂與庭寵等起。然人人實危恐。恐大兵旦夕至。皆悔用廷隆等計。殊自相怨。尤鼠竄于旁近郡者。十家而五矣。於是我兵䟽捕急。生得謝金。周余金隱。鄒賢四人。梟斬長寧市。而廷寵等一十二人。復屬邏卒。大索諸巢中。而給諫裴應章。廼上書劾奏璵。大略謂璵偏聽載永。當調而一麟亦不宜以一司理深入虎穴。與御史張簡奏同。簡尤請建守備一人。或把總一人。庶將官與新令。勢或犄角。得以展布。事皆下戎部。而大司馬譚綸以爲御史議是。弘治中安遠弗率。曾置守備一人。

旋報罷。今請比議使把總往。而以領營兵足民兵三百人備長寧。上從之。頃一麟請。予告弗從。是時楷子盛乾盛坤盛和及葉槐猶存乎。廼以檻車傳致民部。於是徙遼東塞。爲安樂自在州民。

李圓郎者。虔州僧也。少通符法。而其黨王子龍好黃白。能化銅鐵爲金。兩人相爲引重。各以其能號召邑中。邑中少年多有從之遊者矣。是時龍南歲凶。禾黍不入。民易動搖。廼勃勃然心喜曰。此天贊余也。余是與諸逋寇約。約爲聲援。遂與邑中子劉太華。李仕清等。日夜造符書。書成。廼復約諸酋。或寫岳爲號。或帶

墨爲宗。遂偕百餘人走龍南東桃隘。因欲阻之以爲險。擇日鳴鼓祭旂纛。曰。神其祐余。余殆將興乎。頃復引其衆出關。奔道上諸行人馬。跳驅還走南雄。謀欲略府庫。國門之外。桴鼓晝鳴。旁若無人乎。於是翁源簿張霖。始興簿章坤。從邏卒巡徼道上。不可遏。迺告于南部備兵使郭子直。卽移南潁。偏裨吳紳。楊繼祖。潘仕烈。金章。是日提營兵。並雲翔而至。鏖郎等戰。朗等亡。它技徒欲持符呪以爲神。符呪不神矣。是日子龍。張念。卽就縛。劒斬之。生獲酋長李圓郎等二十人。諸偷劉清湖等六十四人。而張懷。王五仔等五十四

人自言吾兵卒非盜然無左驗並繫獄是歲己丑春也臺御史秦耀會御史黃正色請以李圓郎等十六人梟斬龍南市它皆輕重罰治上可之於是賜秦耀爵一級白金二十表裏二之是時臺御史學以東則劉繼文江以西則莊國禎詔賜白金皆十五兩表裏一之居一二年辛卯冬給諫王德完上書劾奏王子龍功先是惠州判蔣杞下行和平事生得子龍并逮繫龍家室八人有狀然南贛已上功莫府以爲劒斬子龍於陣蒙上賞矣一旦聞和平生獲龍急遁移東粵欲劓龍以減口會光啓守惠州得主計者

微指曰。始若等以僞子龍爲真。今欲我以真子龍爲
僞耶。今誠私滅子龍。欺陛下。不則得罪上官。然寧
負上官。終不忍欺陛下。竟縣車而去。於是大司馬
王一鶚案德完奏以復事。下御史問狀。而東粵制
置使終坐李茂事免官。語在茂傳。

讚曰

余過虔南。觀大將軍壇場。建旂鼓常。凜凜以爲細柳。
豈近是與數年之間。葉楷試之。王子龍再試之。豈誠
子龍一身皆膽哉。不然。何其敢于亂也。陛下卽位
以來。郡縣虔南者數矣。定南故蓮塘。長寧故馬蹄岡。

豈非渠率乎。易稱惡不積不足以滅身。此不獨郎等惡。陛下威武神靈所變化。盖亦神矣哉。

饑民胡佩三列傳

胡佩三。餘干人也。曾龍進賢人也。戊子歲大饑。百姓食不厭糟糠。而方珠江文化。獨以倉廩雄兩縣。於是曾龍帥其衆略文化。佩三亦帥其衆略方珠。兩家倉廩皆空。是時。上有詔。詔臺御史御史逮捕渠魁。卽梟示正法。而令林道楠逮曾龍。告于都御史陳有年。請論如新法。兩縣由此皆股栗。自是之後。崇仁有黃京五之盜。臨川有鄒廷七之盜。樂安有龔一之盜。金谿有彭友十八之盜。略倉廩猶胡佩三。而獨聚黨有衆寡異耳。京五至三百人。廷七至七十九人。彭友十

入至百餘人。必何守巡使李大吉。房裏逮捕諸酋。公庭中對簿。而陳偉左驗案五等。黃浩憲左驗延七等。朱萱堯左驗友十八等。皆有狀。於是瑯瑯諸偷于國門外曰。敢爲亂民者。有如此刑。

讚曰

詔曰。朝廷恤窮民。不宥亂民。今數月之內。三郡之間。亂者數起。僥桀不當如是耶。天子致虛內帑。以愛下而下不能以法自愛。旋底滅亡。豈不悲哉。嗚呼。春秋稱豐年補敗。三年耕。餘一年之食。九年耕。餘三年之食。凡爲國亦當如此。

湖廣

款人劉應胡國瑞列傳

劉應胡國瑞皆伍開舍餘也。先是苗夷僥悍。衛中議各結款以自備。由此劉應胡國瑞皆爲款頭矣。父之款黨日增。敢於稱亂。其議與家人丁。自十歲以上。皆報姓名入款。不則與款衆共焚其室。廬略其橐中裝。而是時郡中畏款人甚於苗。卿大夫通判潘應魁司理王哲諸生戚折等亦以名與款。知非款不可也。頃劉應周官欲略諸苗寨。廼詳爲議鄉約。聚黨五百餘人。因與謀遂擣苗寨。縱火焚屋居。甚至執人而僇之。

已復走潭溪。縛土吏及諸生石守成。欲以金錢論贖。久之。守備林維喬以天子命移駐五開城。應等以爲於款弗便也。卽九合款衆。鳴金鼓鼓噪。欲喬出城。郭佛山以居。會指揮使劉璋有弟三人。環璣珠刺應。應死。環等請府庭就吏。先是當路諸公簿責璋急。應有弟曰商。心疑璋及維喬主之。旦日日出。擊鼓大會諸款。款人並擁入喬公館。殺戍卒陸繼堯。李招保。傷二十餘人。奪文移及橐中裝。已毀其公館。改爲飛山廟。於是喬避居民舍。而百戶怨學仁。竟自經死。諸軍旦莫聚城中鼓噪。意欲兩臺許我撫。我去。亡何撫諭

使王之垣使使者馳檄曉譬以朝廷德威諸款迺令監門開關趨喬出城而款果解散也已檄縣道部索諸渠魁久不報是歲萬曆庚辰也明年夏右所軍餘與中所軍餘余豆葉鬪於是中所款頭胡國瑞盧國卿周官劉商等擁衆與右所大戰衛城中殺軍餘彭玉彭大武二人而右所款人亦略中所諸生楊春華等家財而去旦日復戰右所傷五人中所傷一人賴指揮鍾鳴晨解免於是靖州守李瀾執國瑞竊跡苗夷故約殺人者贖贖一人當罰金三百三十兩瑞卽贖一人如約封輸官官以其金半給死者家室治

編村費。它金子右所諸款。擊米酒得修和好。已贖人亦如之。而所贖金盡以給中所楊春華。以春華爲國瑞多鹵略也。居亡幾何。苗人尙萬殺軍餘楊本成。而國瑞捕尙萬。請北舊事。索金三百三十兩。已復使使者。鄉鎬尙萬請演武所。是時國瑞冠金頂冠束帶。擁大蓋。揚揚夾道而馳。及至。則坐堂上。擊鼓左右響呼。梟斬尙萬首。足異處。由此國瑞益貴倨。橫行郡城中。旁若無人。常椎牛合銅鼓。新化諸款人與鳴晨索月用糧。鳴晨借屯糧予之。不足使百戶趙良楚借州帑金。必欲如其數而去。不然者。吾等皆激而爲變。變

則樹旂志並以數十百人馳遁境上也於是湖北公
巡使馬鳴鑾辰沅備兵使張思忠請于撫諭使陳省
御史朱璉廼上善後六策語在驛騎書不載事下吏
兵二部問狀頃大家宰王國光及大司馬梁夢龍一
切如兩臺議以奏上從之於是以僉書鄧子龍爲
叅將備伍開轉遷黃州倅龍宗武爲僉事備沅州而
叅將備伍開當著爲令母更始黎平屬貴陽伍開屬
楚以故衛所賢否不及郡守獨與它郡異而博士弟
子歲歲走貴陽六七百里請學使者試學使者亦弗
常試也以故諸生多扞文罔而附款人者矣先是庭

慶保安諸生歲試赴宣大。及三年射策。則受事於順天。兩臺乃請比令黎平諸生歲屬辰沅學使者。而以三年赴貴陽亦如之。諸生皆以爲便。幸甚。自是之後。黎平亦屬辰沅兵使者。而伍開亦聽賢否於黎平。及辰州邊餉倅移靖州。皆是歲始也。

讚曰

余案楚輿地。旁近蜀與貴陽也。則未嘗不以爲貴陽。黎平宜屬楚。楚平清偏鎮四衛。及蜀播州八司烏蒙。烏撒。鎮雄。東川四郡。宜屬貴陽。往往亦有請之者矣。及察高皇帝微意。倘亦欲犬牙相制乎。而況播州。

爲重慶藩籬。而烏撒諸土吏。又皆非實授者哉。初不
過土舍。幸以漢官兼視之。乃驟欲繩以考課。此豈人
情乎。語曰。利不百者不變法。功不什者不易業。而兩
臺李公江。涂公杰疏。皆以爲宜從故約也。良然。至若
伍開款頭。不至二十人。恐僥爲不當如是耶。

公處劉堂良草坪石集祿列傳

劉堂良，念處諸寨苗也。其不故辰沅所部，旁近西寧、貴筑環四面五百餘里，皆苗寨。苗凡六千有奇。寨凡一百五十有奇。先是，公處諸寨阻山公行。大將軍提兵擊破之。而是時撫諭使於楚，則李江於貴筑，則劉庠而錢岱、塗杰皆後先爲御史。於是大會庭中，議下招撫之令。以何皮夏諸寨劉堂良等六千人皆矜甲面縛請降，願歸土六百里。得附編氓後輸賦。死生唯將軍所命。先是，叅政使項思效、叅議使龍宗武副觀察使晉稷，僉事使夏良心，所以撫之者，甚備。然意猶

於兩臺兩臺皆以爲可。廼使指揮使一人也。天住所
專以撫苗爲務。每寨立寨長一人。或四三寨。或八九
寨。立團長一人。歲秋九月。封輸賦稅金入靖州庫。餉
入天柱倉。屬備兵使按驗。而以三年毋過舉。則用鼓
吹花幣賞勞如令。上幸從大司馬張學顏覆奏以
爲議是。賜李江金三十兩。劉庠金二十兩。表裏皆二
之。頃思教等金十五兩。是歲萬曆甲申也。使撫諭使
諭功同知則李梅。通判則張武。知州則王新民。吏目
則胡文渚。知縣則胡天祿。叅將則鄧子龍。守備則周
弘謨。指揮則鄧禹。千戶則陳文魁。騰霄百戶則郝

文渙。上於是賜張斌等金皆八兩也。

石纂祿。草坪苗也。已卯。奪天星寨。苗兵總蒲勝等仇冲田。已殺吳順和。逐寨民二十餘家。明年。天星寨吳什。傳天文亦糾特洞龍集寨胡才。殺草坪苗龍顯等。而是時石纂祿石才看。復殺龍集吳才和。逐寨民六十餘家。奪其田土。而龍集諸苗因與天星寨鬪。又殺吳看良等六人。已攻天星。及陳團。殺吳攢道。吳思保等十餘人。兩家由此相仇。殺亡已時。而巡徼者百戶周之屏。乃告於黎靖。悉將黃斌。卽移撫諭使邵陞。御史甘士价。下分守使郭榮。備兵使虞德輝。問狀屬還。

司方承蛟詣草坪天星往逃不至復使吏目吳廷秀
往又弗至於是使百戶黃鍾音及文獻朝馳陽朝雅
問鍾音卽請兵與俱行至草坪月圍坡諸苗見漢兵
甚設并皆披甲兵貫弓矢鄉鍾音鍾音睚眦盡裂大
罵諸苗欲輸金五百贖吳思保死趨獻朝下坡以爲
諸苗必不侮漢兵也我兵遂鳴銃奔騰皆大亂而諸
苗楊慶和石看清楊道總等皆爲敗北引兵至爛泥
所而石曹金曹滿與楊慶和遂擁衆殺鍾音及兵王
明等三十六人於是守巡使急使辰州倅祝養蒙靖
州守鄭雲鏞永從令孫夢熊五開指揮戚元勲並馳

草坪。因下令。有如誠獻渠魁得除罪。而石曹金曹清
等抗拒如故。而會分守使使使者石惟忠。送奉火牌
至團屯止舍。而諸苗石纂寬。石金才等。亦皆披甲持
兵。以爲曩時黃鍾音罰我金五百。方是時。我窘急。激
而成亂。誠有之。廼以楊慶和。老益就吏。下靖州獄已。
復使守備吳時喬。曉譬如初。而諸苗皆惴惴焉。恐大
兵有如一。日蚤臨。柰橐裝何。并皆轉運入山箐。負固
不出。喬廼以檄趨諸寨。諸寨復膠致石看才。楊道總。
詣分守使郭某所。且日出慶和對簿庭中。皆叩頭服。
實有之。居叻何。明經吳大榮。與地青特洞諸寨。惡某

坪辭且染已。皆願捕斬渠魁。於是以羽檄徵西粵六甲苗兵三千人。期七月初九並擣陽朝。行未至草坪二里。我兵皆止壁傳餐。頃地青苗兵陳發楊信古。賢眉壽等。攻草坪。先登却敵。生得田能。老王等八人。斬老安等首六級。餘黨皆委心歸降。諸寨悉定。而兩臺卽移書貴筑撫諭使許子良。御史趙士登。因上書諸襲鍾音子男。而以郭棐等紀錄。黃斌罰治。是歲萬曆己丑也。其後甲午撫諭使郭惟賢議。比嘉靖中辰沅諸苗屬永順保靖二宣慰。因禁官兵毋得私以錢贖所鹵人民。上皆從之。恐諸苗以鹵人爲得笑也。

讚曰

辰沅旁近。廣與貴。歲歲苗夷爲患也。明興建。叅守及平清諸衛所。可謂至備。且以漢而視。滅諸苗。猶九牛一毛耳。然而劉堂良順命則生。石纂祿衡命則死。由此觀之。漢主有神。舞于羽于兩階。有苗來格。豈皆欺我哉。

牛角尖大盜列傳

牛角尖大盜其姓名靡得而考也。癸酉夏鉅盜五十餘人。捕伏牛角尖。略江上諸行舟。因縱火焚燒江干。諸編氓乘秋水鼓行。至白虎鎮。道逢巡徼吏李德彭。應宮挑戰。斬首二十餘級。諸偷皆遂逃南岸。而邏卒樂章叔等追亡逐北。會天反風逆。我兵弗利。諸偷皆窺隙鑿我兵。我兵樂章叔等不幸。湛船赴水溺死者可五十餘人。巡徼吏見爲邏卒旣敗北。怒至睚眦盡裂。於是躬帥黃頭郎追逐至武家穴。疾力戰獲生口一人。斬首一十餘級。而下江防備兵使戰浹止。諸上

其事當事者於是撫諭使趙賢直指使舒鰲皆輕重當汝止以下罪。奏聞。上罰戢汝止。以彭應官等下御史逮問。江防事。詔嚴加申飭。而大司馬譚綸以爲汝止誠有罪。顧蘄陽去牛角尖三百里而遠。而軍書一至。汝止卽提兵捕斬得除罪。請。予俸。稟食縣官如故。上悉從隆慶末捕盜條格也。故事。郡縣盜至十八以上。長吏及巡檢吏皆左遷一等。至二十人倍之。三十人免官。而備兵使自五十七以至百人以上者。罰治亦如之。而牛角尖盜至五十餘人。當左遷。然汝止後先所撫獲亦旣已五十餘矣。廼貶汝

止俸一等。上文念皖城巡徼吏捕斬諸偷積功勞
詔紀錄擢用。方是時三江口尚未建守備使乎。先是
邏司備兵於此。得亡恙久之。裁冗吏議罷。今其下左
通團風。右通七磯。三江合流。直入樊口諸湖。而盜賊
馳突。迅若風颺。往往我兵追逐弗克。及明年夏。御史
李栻上書。請以守備使一人。備三江口。以岐亭故
有守備。近建縣亦罷。顧第復除耳。於是清赤壁邏司
兵可得一百有一人。掣斬陽成清浪兵可得四百八
十餘人。已謂清浪故備桂陽也。罷弗便。請以武左縣
黃四衛屬守備。唯所調度。各戍軍二百人。太尉參議

四斗五升。魚鹽一錢。春夏備江洋。秋冬巡檄麻城黃陂黃安諸山寇。與洞庭守備使。皆互爲響應。以上從之。時甲戌夏也。是歲江以西。無論使凌雲翼。亦上書奏瑞昌大姓柯黃事。柯黃之衆。至三千餘人。而其人大半受廛于興國爲編氓。置生產。建室廬。及于文用。則輒言吾等旁郡人。何至就有司對簿乎。於是請立寄庄戶。輸賦州庫。而興國居瑞昌者亦如之。詔許之。謂立里設戶。於便催徵辦納。良便報是。

讚曰

山川沮澤。荆楚之望也。盜賊故鼎沸於其間。而豈一

日之積乎。余觀上下。皆建江防使。及洞庭守備使。旂
鼓相望。豈不率然。而復起自牛角尖者。何哉。語曰。禍
福無門。唯人所召。若等祇自送死。吾豈耳。自趙公議
建三江。旣固壘而守。則赤壁諸邏卒。罷之誠是。二十
年江干得亾恙。豈非趙公力。吾屬幼子童孫。且何以
報公哉。

山賊劉汝國列傳

劉汝國別號少溪。斬黃大盜也。戊子夏。大盜梅堂公行斬大同略蔡永季等。而汝國附堂而起。執邏使。加以析楊官兵追捕。輒殺僇。縣於樹頭。以示威重。會堂被逮。上有詔梟斬斬陽市。而汝國與余孟新。詹三漢。陶九兒。賈九兒。趙燦等。遠逃走太湖。幾就縛。得脫。廼縛汝國。孟新妻。檻車膠致黃州繫獄。而是時番僧五人善舞棍。剽客三人善舞刀。聞國常爲郡縣教師。武技絕倫。皆過宿松長溪山。從國遊。國自以爲能得人也。而郡縣又大旱。赤地千里。皆可資以爲亂。大害。

通與諸倫約。自稱順天安民王。因鑄銅符。治旗志。大書刻富濟貧。替天元帥。而汝國冠幘頭。衣紅袍。孟新冠唐巾。衣白袍。出入擁大蓋。策駟馬。道上鼓吹響呼。而馳甚自雄也。常往來二郎河。知玉樹觀。宋元三諸宅。積聚穀米頗多。國等許爲借宿。旦日開園鹿。招致飢民。飢民窺左足而應者數十百人。國并皆執以從。已頃之。國等復帥其衆。走廖桂賢宅。因欲犯觀音巖。小丫嶺。而界上兵威甚都。不可去。遣使李甫帥兵二百人。轉戰城隍溝。弗克。遂焚燒楓香驛。頃復燒停前驛。釋獄囚。執過使。略婦女居民被火者。亡慮數十家。

賴指揮蒞勲百戶鄭國重追逐得解是時國等氣稍衰而鼓不起以軍中有女子故也於是備兵斬黃者副使陳朴移撫諭使邵陞御史柯挺政欲得應天操江檄至而後請弓矢也居叵何給諫李廷謨乘傳過停前歷楓香汝國方流劫湖口殺民兵一十七人還略宿松汪孝廉余太學吳省祭太湖周苾趙民趙七與劉寄妻及其媳而吉夢麟鏖戰殺七人已略黃梅汪兵馬等至城門儆戒道路不通謨乃先以書奏矣而撫諭使急使副使李杜馳大同僉事陳吾德及陳朴馳停前陞始具得其狀以一請與操江都御史王

用汲應天都御史周繼御史喬壁星所劾奏同先是
安慶守李守約太湖令王一鳴宿松令文立本以入
計行得不論治論治同知行府事魏樸如及太湖丞
鮮廷相巡徼汪渙宿松丞劉逢春巡徼秦尙質守備
萬鹿年獨重也上有詔詔各巡撫督率所屬協力
勦捕不許推諉觀望而鮮廷相以下皆住俸待罪行
間於是大司馬咨江以西臺御史莊國禎等以羽檄
徵偏裨諸將軍詰信地時已丑二月也而洞庭守備
孟儒偕閑住守備周弘謨以夙有風望提兵過黃梅
而備兵使趨縣令王文昌擊牛酒犒軍而是時道路

言汝國欲略縣庫。邑中多有携家室遠徙者矣。儒等
既行至宿松長冲庵。道逢比丘數人。皆目動言肆謨。
疑卽誘我也。卽帥兵啓行。行未至門。庵內果火起。焚
燒行李及糗糒。謨見居民皆畏賊如虎。弗畏將。皆爲
賊耳。曰。廼請微微播犵精兵。姑案甲弗舉矣。而會斬
州倅陳策善射。以爲何物。汝國敢慄桀如是耶。廼帥
鄉民田金浦等往。謨間卽使使者止策毋往。策竟往
也。於是孟儒自小丫馳長冲庵。弘謨自二郎河馳吳
本仕家。時國等亦自長溪移柴家山爲險。而策已決
策。出不意。乘隙從山後直搗其巢。巢中賊固已偵知。

其事矣。先據竹麻尖。遲我帥。我帥居其下。策與弘謨皆貫弓執矢。射策中一人。弘謨中十餘人。國等殊以死鬪。而龍坪武家穴。水兵周彭周繼等。不利山戰。皆往後山奔馳。自相蹂踐。傾跌下山坑者。不可勝數。策被二創死。弘謨被二十餘創。男諸生應時被一創。賴千戶王有德。百戶赦文煥。武舉周恩治。武生瞿加詔。復疾力戰。國等始稍解散也。先是指揮陳鉞。千戶司邦典。一軍軍於太湖。指揮朱璽。千戶張一龍。百戶戎賓。一軍軍於宿松。而分巡使陳吾德。乃爲檄。使比丘二人。招汝國降。汝國亦報以檄。弗降。比丘國黨也。德

卽梟斬比丘黃梅市。自是之後。汝國亦移書令公。大略欲靖黃州。毋繫家室。廼書稱爲急取小事大。明臣劉汝國申請宿松本位。欲投靜而不得靜。欲投安而不得安。今爲豪家作惡。取財賞貧。母以小失大。其爲不恭類如此。而是時汝國已遁入陳漢山居。居民朱淑宅。虛倉粟以招致窮民。於是宿松兵彭炯等挑戰傷五人。而陳鉞執弓矢。邦典鳴鉦砲如雷。殺賊十四人。賊竟縛邦典。傷左肱。殺陳鉞及家丁陳三。兵勇鄭榜。教師何理。畢欽等二十餘人。殺復過當。國等乃乘輿入宿松邑中。適縣令亦自府至。令入自北門。國等

入自南門。白晝大都之中。並鼓吹樂作。又若一令云。
語在給諫孟養浩薦黃梅令來三聘。桐城令章守誠
疏已。國等復馳二郎河。斬兵田玉經等。追逐逮諸偷
陳尚貴等二十一人。就吏而玉經亦被殺。僂死。於是
劉逢春乘賊薨。二郎河夜半。微使人縱火燒吳本仕
及陳漢山糗糧。因捕奸細高于洋等繫。而諸偷則已
馳清灣河矣。而臺御史周繼。御史喬壁星。陳邦科。皆
復上書以聞。而是時給諫張希臯。杜廉亦劾奏賊
久不滅。上有詔。詔將令歸。一不許互分彼此。違拘
誤事。而陳朴。偕分巡使陳吾德。屯黃梅。分守使馬鳴

鑒。屯廣濟。徵寧備兵。使屯太湖。而播兵及池陽營兵。休歛初黥教師。打虎手。桐城民兵。安慶募兵。皆四面而至。由此分爲六軍。而吳兵由南陽露少河江家嶺木頭嶺而入。楚兵及播兵由藕池長冲庵而入。皆不至柴家山十里止壁。令武舉柳邦奇居中調度。國等度勢寡弗敵。夜半皆焚巢而遁。孟儒弘謨卽追亡逐北。生獲謝大貴。孫二老。許浩。王三漢。王六兒等二十餘人。諸偷復欲奔。師上山。志在窺蘇杭。屠安慶。拔黃州。奪其家室而去。而是時德州大盜凌子登亦欲因汝國並起。爲州守任春元所逮。於是指揮陳懋功有

戶黃希賢。王夢勳。趙宗普。馳兵徧南陽國等果衝鋒而來。懋功挑戰。斬陳養初等首六十二級。生獲小張二等一十二人。殺傷亡筭。奪獲大將軍印一顆。濟貧招賢旂七面。器械一百五十有奇。馬羸十頭。諸倫悉走。天鷲尖會莫休兵。旦日諸路兵聞賊敗。皆五合六聚。至而千戶張啓甯。百戶蘇時霖。生得王勝等八人。斬胡六等首四級。馬四騎。指揮潘欽。百戶姜宗尙。生得王六等十七人。斬獲王長二等首三級。指揮楊文明。生得李朝陽等六人。趙應奎。郎子機。生得胡子四等十二人。斬張祖等首二級。武舉黃官聲。生得萬祺

等十人懷寧倉大使湯應龍生得陳廷禹一人潛山
司訓駱廷偉生得王文等二人斬二漢首一級劉逢
春生獲賈憲七人斬劉九兒首一級解廷相帥汪渙
生獲余孟新及吳景等四十八人斬鄒六首一級復
分曹追逐至金堂寺生得劉汝國然吳淞兵多有力
也頃撫諭使周繼邵陞及御史喬壁星下太平同知
楊際明訪誅納皆如狀廼以捷奏事下大司馬王
鶚覆議上於是賜周繼邵陞王用汲金二十兩表
裏皆二之而郡邑長吏及巡徼吏皆開俸稟食縣官
如故劉汝國余夢新等梟斬安慶市其後喬壁星陳

邦科奏直隸諸功罪御史井士价奏楚諸功罪。上於吳則賜袁國臣金十五兩。陳懋功等金十兩。潘欽等張應奎等金八兩。駱廷偉等魏樸如等金五兩。王一鳴等罰俸凡三月。於楚則賜陳吾德金十兩。孟儒等金八兩。王有德等金五兩。已念陳鉞及陳策以王事死於兵。贈鉞秩一級。而策以州倅得轉遷。乃復欲捐生以滅賊。此皆非人情。廼以子一人入監視太學。始湯太學張子禮等皆大姓。各蓄義兵以自衛。撫諭使常欲招致戲下。於是黃梅曾思學牽家丁數十人深入賊巢。攻巢先登。陷陣卻敵。皆其所弗避也。

讚曰

兵法百里而爭利者則禽三將軍。今孟儒至自小丫嶺弘謨至自二郎河皆去柴家山各七、八十里卒禽陳策傷弘謨良然。余居里閭習聞汝國孟新故起自匠人門子甚微眇。廼致興大兵動大衆異哉。語曰一人守險千人莫過。以柴家山而視長溪陳漢豈不尤險。要之往來停前驛可守矣。宜其增兵而建堡也。

山賊周志棋列傳

周志棋邵陽人也。己丑歲大稔，穀貴民流，不厭糟糠而黃仁倫獨豐於財，困鹿充盈。志棋廖伏童乃與廖顯坎嘆曰：吾等欲稱債於彼，然終不可得。果爾，遂至饑餓死耶？於是褊袒一呼，應者數十人。夜半直走仁倫所，殺陳祖儉及其子，以示威武。已開倉廩，疆奪其粟。會邏卒擁衆來收，卽逮捕志棋、伏童及脇從周志道、李宗元、廖顯坎、廖顯武、張太一。周才栢到縣庭對簿，傷人及盜皆有左驗。縣令請於臺御史邵陞、趙當渠魁周志棋、廖伏童罪至斬，而周志道等以搶奪加

竊盜罪而等間徒笞九十。於右臂膊刺捨奪二字。發
郵亭二年半。先是 上有詔。亂民在所不宥。而大司
馬王一鶚竟以令甲。強盜已行得財。不分首從皆斬。
當廖顯坎等六人梟斬如法。上從之以是時捨奪
之風熾也。

譏曰

余嘗南遊洞庭。泛三湘。見其下沃壤。穀賤則未嘗不
仰天而嘆曰。嗟乎。賢生稱積貯者。天下之大命也。豈
不信然哉。邵陽易得。禍皆可倣社倉法。假令行社倉
法。則何有周志。棋平。詩曰。蔽芾甘棠。勿剪勿伐。召伯

所葭邵陽是也。今其棠在國門外。枝葉猶茂盛。父老傳以爲吉。甘棠也。

叛兵王禮董承恩張鎖兒張勝豪列傳

王禮董承恩張鎖兒皆鄖陽戍卒也。鄖陽故建行都司。頃報罷建叅將一人。堪輿家傳以爲縣學金星居兌。旗鼓列前。可居叅將而行都司高廩。可建學。丁亥冬。鄖陽兩學諸生胡東昭徐登高宋申東廖光宙等。乘叅將米萬春未到官。請於撫諭使李材。欲改行都司爲兩學學宮。而以縣學爲叅將府。兩便撫諭使弗從。而會分守荆南使丁惟寧與鄖陽守沈鉢亦以文移請。從堪輿議也。臺御史始可之。頃東昭等亟爲改圖。而諸軍皆鼓噪起。何至毀我府所拮据。而徇彼姦。

於是毀郡門。已馳詣生首事者。屋居悉毀之。城中罷市者三日。撫諭使廼以書奏。川上有詔謂府官輕信生員。妄動生事。上司官失於鈐制。下戎部及給諫雜問。後罰材俸半載。惟寧俸一載。鈇等屬御史柯挺逮問。方是時。兩浙及神木諸叛軍皆相扇而起。而御史郭萬里。彭而珩。及給諫楊其休。陳璧。彭國光。顧九思。朱之鵬。皆後先上書。大意謂罰治太輕。先是御史李飛龍劾奏。郎陽叅將開關皆鼓吹。與軍門埒。而軍門海一章奏。上必閱。而後發。唯恐語及諸軍。後撫諭使裴應章奏曰。何至是。始臣以謂陵行至均州。適

接驛騎書。科臣舒弘緒追論米萬春及梅林事而道
路遂以爲上有詔逮捕四十餘人。且言梅林慄悍
必不可逮也。及到郡。先使一使者縛林。林卽就繫矣。
誰謂林難逮也。於是詔書切責奸徒輒造訛言。搖
動軍情。屬兩臺訪逮事皆下戎部。時丁亥十月也。自
是之後。惟寧從襄陽旋至遠池。去勛可六十里。先是
詔書未下。郎之戍卒固一千五百餘人。皆徙其家室
以爲有如一。旦加兵計。且先發而會寧至。下令購獻
渠魁。不然卽加以兵。軍中聞而思反可知矣。旦日諸
軍果群赴。惟寧所請餉以觀寧微旨。寧怒。譴之去已。

諸軍度惟寧意終不善也。以爲莫若吾等先舉。旦日請餉如初。寧乃榜掠之。諸軍並攘臂而起。惟寧卽退。堂獨與一門子循牆而走。傾跌幾受傷。已操一小艇。馳數十里。始至所館也。而當是時。變起堂皇。倉卒易爲亂。賴左右守簿書。幸亡恙。亡何撫諭使急使使者。以徇。解散已。復令捕斬渠魁。得除罪。於是諸軍生縛王禮。董承恩。張鎖兒來獻。材乃具疏以聞。聞。與惟寧秩三級。而大司馬嚴清議覆以奏。太略謂鄖陽之役。乃至罰撫臣及守備。左遷兵備使。逮大守法至嚴也。而諸軍之驕橫。何謾無一法相加乎。而況比

年以來陝西靈州之變捕斬楊文遇等三十一人。浙
江兵民之變捕斬丁仕卿馬文英等一百六十餘人。
廣東東山之變捕斬諸渠等一百九十餘人。廣西平
樂之變捕斬張鳳等二百三十餘人。梧州之變捕斬
梁一貫等五人。四川建武之變捕斬李德等十人。今
毆兵憲者王禮也。請致於法。上有詔梟斬王禮董
承恩張鎮兒以徇軍中。先是詔捕梅林訛言欲屠
鄖陽。於是城中之人皆若狂。盡奔走。幾無人。明年春
裴應章復上書以聞。上令梟斬梅林。它一切勿治。
林亦瘦死獄中。梅林故臺御史書佐也。釋文弄欲法。

專佐三軍有變而欲因以爲利。始諸軍發難時。並鼓噪軍門。縣諸生於高竿之上。令其呼都御史名曰林。數而辱之。不則于督俱發。已欲召臺御史講和。材乃不得已。疆從門間相荅。諸軍以爲非真材也。稍以面覩相示。始解。語在舒弘緒疏。然此皆林之主謀也。居亾何。御史楊紹程案米萬春罪。上曰。罷不必又有搜求歸罪將領。應章亦請以萬春視事如故。意在欲安軍心故也。初撫諭使張國彦請標下中軍官兵。上未從。以故鄖陽兵殊寡。爰三軍並鼓噪。材具言。吾無一兵一卒之可依也。

張勝豪辰州軍令也。庚寅中常冒逃卒蒙四名字。稟食辰沅之間有年。頃沅州復當予工食辰州予口糧而會臺御史貴筑林喬相楚郭惟賢御史徐兆魁念辰沅諸軍提桴鼓旦莫立軍門甚勞苦工食給三萬二千七百五十有奇口糧給一萬九千八百有奇米六千六百余石以上然皆起自二十年也。前是戊子以來水旱相尋歲比逋負而叅將奇德守備彭洪漸通文移願從諸軍議給餉得由遠及近故將近年額征錢米截數支領直抵郡邑。曩故所逋負也。於是勝豪卽與米如學及乾州哨兵潘仕遵議而以為裁軍

無工食殊無錢用也。計莫若聚衆以圖之。然非吾三人爲長莫可者。而是時備兵使孫守業新到官。官事而分守使陳性學乃以口糧金使淑浦丞唐以誦給諸軍。勝豪乃告如學曰。始吾與公言何如。今遽欲盡得餉金哉。是夜夜半。豪等自乾州哨。各執鬪器擊破隘口。約諸軍與俱。並馳灣溪。強虎哨。強虎哨閉關。強豪等勿出。豪等復擊隘門。毀其屋居。直走簞坪。拔城而入。而守備使袁時太引兵捕伏岩山。執如學。勝豪大言曰。若不釋如學。吾斷若頭矣。廼解縛。卽馳洞口。已馳清溪哨。毀指揮使公署。已馳五寨哨。而勝豪之

衆固已三百餘矣。皆由間道馳黃公冲。因至石羊哨。復毀何指揮公署。馳水田營。而麻陽令羅俊民先已使邏使朱廷臣奉檄招撫矣。廷臣既由石門至石羊哨。告豪等。豪等不從。竟馳水塘凹。已縣復置白牌紅旗各二面。大書撫諭使使者。張汝烈送奉紅旂懸桅杆。示豪等。令豪等止。舍河上。族縣令至。而後使豪等得入城。也是時城門儆戒。獨開東門。豪等乃毀折旂杆。殺監門張大達。遂入城。奪居民王安劉天元等數十家酒米及羊豕園蔬食之。俊民恐生它變。廼令城中居民每家暫留四三人。或五、六人寄宿。已擊牛酒。

犒豪等因給米五石金二十兩令解散豪等殊不滿
意以爲曩者缺我輩餉凡十五月必如數而後可也
於是俊民請於守廵使因告三臺廵使指揮使汪如
淵送奉旂牌掃洒河上鳴金鼓設案焚香召豪等跪
起聽宣 朝廷威德豪等叩頭我知有死罪漂漂殊
不足以辱明府斧鉞也俊民見豪等旣知悔罪以爲
所志不過在餉金然此自當予者亡它賜廵請沅州
庫凡四千六百二十有七金屬經歷李聯芳給軍此
廵曩者豪等所不避刀鋸以請也今得餼飽其欲而
去豈不愉快耶而是時三臺欲得渠魁甚亟乎俊民

以爲豪等。旣幸得除罪。又予金。自以爲得志歸。必不
意我邏卒從中起。廼先期使使者。黎得勝等。捕伏栗
出。四頃豪等果揚揚仗馬筆來。遂入監。欲瓜分其金。
而得勝等直乃。卸鎗勝豪。仕遵二人。篋與膠致。指揮
王尚仁所。請於三臺。事下。備兵使。以軍法拷掠百餘。
割左耳。以徇三軍。而米如學。先從監中得越牆。鳥徙
去。後邏卒滕啓賢。生獲如學。來獻。及行刑。亦如之。於
是三臺見勝豪如學。故千戶錢可大所部。仕遵。故指
揮蔡正國所部。皆輕重當罪。以請。是時乙未夏也。
初辰。沉以脫巾。見告者數矣。而兩臺以爲計。莫先蔡

足餉。餉出辰常者什之四。出長寶衛永荆岳者什之六。於是月有催。季有比。歲杪有查。叅之法可謂至備。曩者豪等所謂缺餉十五月。皆郡邑舊逋也。

讚曰

韓子稱所用非所養。所養非所用。信哉是言也。鄖陽之變。辰州之變。皆疆吏所秦養者。何至以一糗糒之故。遂反唇而相稽哉。悲夫。一脛之大幾如腰。一指之大幾如股。假令賈生而在。何勝哭焉。孔子曰。足食足兵。楚事非不足餉明矣。蓋番鎮之遺禍也。

福建

平莆田游天王柯守岳列傳

柯守岳莆田山寇也。邑故有廣業里可一百二十里而遙。其上重岡疊阜。深峻紆迴。號爲盜藪。守岳乃結寨於其中。開山而耕。里中皆以爲治氓而無有窺伺者矣。當是時。日者顏玉湖善言五星。及卜筮。虛高人爵位以誘人。往視守岳。陰許之。先是雷伍何南山許一溪等與岳有密謀。聞玉湖言。勃勃然心動。自言游天王。授余兵書寶劍甚神密。由此暴子弟多有從岳遊者矣。是時里中丘汝夫久有異志。亦歸岳。期欲舉

事。廼相與謀曰。今歲饑民流。城中斗米金錢以上。欲
舉在此時。時乎不再來。岳曰。必山石生花而後可。居
亾何。岳祥使人言。永春南安石生花。岳廼與汝夫笑
曰。時可舉矣。卽約范龍蒼。溫古塘等爲一黨。椎牛以
盟。項以赫疏爲簿。記諸盟者名姓。岳獨不書名姓。惟
掌諸名姓簿籍號召諸酋。是日卽鳴金鼓張旂。大書
游天王立。雷伍爲隊長。許一溪爲中將軍。范龍蒼爲
東方將。吳湖山。張西溪爲旗首。許石溪。曾湖江爲甲
長。劉榮。陳六等爲兵勇。皆服五色衣。召玉湖居其中。
演禽視吉凶。於是塞井夷竈。與雷伍等行。行未至滿

長略賴京環家產及羊豕。犒從者。先是漳州人鄭志弘與汝夫約。頃食盟。汝夫廼索弘殺之。取其血。舉旗鼓。遂入永福。所過必縱火焚屋廬。屋廬皆爲炭燼矣。而分守使馮孜請于臺御史周家。因使指揮使楊昌言招徠岳降。岳詳爲歸降。旦日復鹵陳四李德厚等而去。廼使吳桐至滿長。詢事。事覺。百戶王元陽執之。而岳已過五都至石壁矣。我兵行捕。斬楊玉泉首一級。生得顏玉湖一人。而岳亦殺鄉兵一人。鹵丘子清一人。斬鹵相當。頃還走斗湖。止劉茂所。遂略其橐中裝。走大洋。樟樹壘而去。於是把總王子龍提兵至斗

湖岳等又復遠遯矣。龍追逐抵烏石巢。廖岳戰大破之。斬王子龍。溫古塘。羅梅林首。生得許一溪。曾湖山等十餘人。奪獲弓矢旂幟諸什物。雷伍等皆亡。抵深谷中。是時把總胡全度岳必從間道走。廼以軍軍廣業白沙間。庶扼賊間道。亡何雷伍范龍蒼等果至。於是全兵捕伏從間道起。擒卒得雷五等二十餘人。復疏捕獲陳祿許石溪何南山二十餘人。岳猶得遁。閩安鎮頃柯守和具以實告。邏卒跡且至閩安。乃捕岳。獲輿膠致軍門。下守巡使大會庭中。輕重當岳等罪以聞。事下大司馬問狀。是歲已

丑夏也。其後大司馬王一鶚請以柯守岳等四人梟斬莆田市。坐范龍等一十七人罪至死弗赦。始吳桐妻朱氏與陳見泉通。見泉因強執桐往。桐非其所願也。大司馬以桐等十九人與俱。有可矜。乃請比陳受恩例得減死。陳受恩岑岡賊也。都御史秦耀以賊從故請適邊。上可之。

讀曰

以余所聞莆田與永興接壤。號爲盜藪。猶以沈命法行之可乎。不可乎。守岳以一亡命。群聚不逞之徒。相扇而起。莆田幾動搖。然陛下有靈。旋起旋滅。亡岳

亦何爲哉悲夫捧土以塞孟津多見其不知量也

鎮海龍王宮諸倭列傳

萬曆十一年閏二月春汛有倭操舟十餘艘從西南來居二三日有倭操舟二艘從東北來命榜人鼓汛而內走走鎮海洋甚急橫海將軍以兵鏖諸倭諸倭望見海上舳艫如雲旌旗耀日皆大懼懼誅反風走外洋復鼓行而去也是年春汛得亡恙幸甚於是都御史趙可懷具以實報上先是懷到官督事會壬午冬汛甫畢懷爲閩畫太計莫先于海防廼躬自詣諸寨嚴舳艫簡士卒以故諸倭獨畏懷不敢入閩界父老傳以爲戰陣之具鉦鼓之教未有甚於此時者

也。

明年三月復春汛。有倭至自東庠黃崎牛山外洋。及龍王宮洋。把總黃道常從樓船卒乘風要而擊之。生得倭酋姚沙機一人。脇從漢人一人。斬首十三級。奪獲被鹵漢人一十六人。故事倭不至百餘人。舟不至一二艘。而酋長僅爲舟主者。能捕斬一人。予十五金。倭從一人。予十金。漢脇從賊一人。予五金。皆不得叙爵賞。是時黃道部兵在海上。法不當日報禽斬。迺竟自報也。於是御史楊四知具以請。上事下大司馬張佳胤。以何官舍魏應坤鄭春白敦貢具言生得倭

酋長一人願爵賞。戊卒蔡時宜生得倭從賊一人願
論贖。皆於令甲不便。令甲戊卒必捕斬三人。得除罪。
於是坤等不當叙爵賞。賞金坤等十五兩。宜十兩。
詔可之。

讚曰

余考九邊。自遼至關中八千餘里。而海亦自東粵至
遼八千五百餘里。殆異哉。閩亡它患。患苦海三四月
東南風汛。諸倭往往自粵趨閩而入於海。所從來久
遠。頃頗亡恙。豈有道則先服。倭亦然耶。